

10. श्यामपुकरस मंज श्री रामकृष्ण

आथवार 18 ओंक्टूबर 1885

अज्ज छि विजयदशमी (दशहार) श्री रामकृष्ण छि श्याम पुकरकिस मकानस मंज। शरीर छुख नासाज्ज रोज्ञान, कलकत्ता छि यलाजि बापथ आमृत्य। बँखुँत्य छि हमेशि अँतिय आसान तँ तिहुँज्ज सीवा आसान करान। बँखत्यव मंजुँ छुनुँ काँसि समसारुक त्याग कोरमुत। तिम छि पननि गरि प्यटुँ यिवान गछान।

दुहुक पँत्युम पँहर छु। डाक्टर छु आमुत। डाक्टरँ सुन्द्य न्येचिव्य अमृत तँ हेम छि डाक्टरस सूँत्य आमुत। नरेन्दर बेत्रि बँखुँत्य ति छि हाँज्जिर।

श्री रामकृष्ण छि खलवख पाँठ्य अमृतस सूँत्य कथबाथ करान। प्रिछान छिस—‘च्येँ छुयि ध्यान लगान?’ बेयिँ छिस वनान, ‘चुँ छुखुँ ज्ञानान, ध्यानुँच अवस्था किछ छि आसान? मन छु तीलुँ दारि हुँद्य पाँठ्य सपदान। ईश्वर सुँजुँय फिक्किर छि रोज्ञान। तथ मंज्ज छुनुँ बेयिँ कांह सोँचुन यिवान।’

वोन्य छि श्री रामकृष्ण दोयम्यन सूँत्य कथ बाथ करान—

श्री रामकृष्ण—(डाक्टरस कुन) चोन न्येचुव छुनुँ अवतार मानान। यि छु ठीक। छुनुँ मानान तँ मतुँ माँन्यतन।

‘‘चोन न्येचुव छु बडुँ जान। तँ आसि तिनुँ क्याज्जि? बमयि अम्बुँ कुलिस छा जांह कुनि चोकि अम्बुँ नेरान? दयस प्यठ क्युथ विश्वास (पछ) छु तस! येँमिय दयस प्यठ पछ छि बस सुय छु मोहँन्युव। मनुश तँ मन-होश। येँमिस मंज्ज होश छु—चैतन्य छु, युस पूरँ पछ थँविथ ज्ञानान छु जि ईश्वर छु पोज्ज तँ बाकय सोरुय न रोज्ञान वोला, सुय छु पँज्य पाँठ्य मनुश। अवतार छुनुँ मानान तँ अथ मंज्ज क्याह दूश छु? ‘दय छु, यि सोरुय जुव-जाँच छु तिहुँद ऐश्वर्य,’ यि माननुँ सूँतिय सपुद—यिथुँ पाँठ्य कांह बोड मोहँन्युव तँ तसुन्द बाग।

‘‘कथ छि यि दँह अवतार छि; चोँवुह अवतार छि तँ पतुँ छि आँथु रँस्य अवतार। येँति कुनि तिहिँदि ताकतुक खास प्रकाश छु ततिय छु अवतार। म्यान्य छि यिहय राय।

अख कथ छि बेयि; यि केँह छुख वुछान यि सोरुय छु तिमय।—यिथुँ पाँठ्य थरि हुँद्य ब्यौल्य, खूफरँ, गूज त्रेँशवय मिलनॉविथ छि अख थँर। यिम प्रथ विज्जि आसुँवुँन्य छि, तिहुँजुँय छि लीला ति। नित्य (प्रथ विज्जि आसन वोला) त्रॉविथ छुनुँ सिरिफ लीला समुँज यिवान। लीला रोज्ञानुँ किन्यी, लीला त्रॉव्य-त्रॉव्य छि लूख नित्यस मंज्ज गछान। योतान्य ‘अहं’ बोद छि रोज्ञान। तोतान्य छुनुँ लीलायि दूर मनुश गँछिथ ह्यकान।

डाक्टर—स्यठा ठीक छु।

डाक्टर छि वनान, ईश्वरन छि सॉन्य सृष्टि कँरमुँच तँ असि सारिनुँय लुकन हुँद्य आत्मा करन आँथुँ रोस्त तरकी।’ तिम छिनुँ यि माननुँ बापथ रॉजी जि अख नफर छु काँसि दोयमिस नफरँ सुँदि खोतुँ बोड। अवय छिनुँ तिम अवतार मानान।

डाक्टर—आँथुँ रोस तरकी। यि अगर न आसि तँ पाँछ सथ वँरियि बेयिँ बँचिथ क्याह सपदि? अमि खोतुँ छुस बुँ हँटिस रज्ज गँडिथ फाँस्य लगाँविथ मरुन जान ज्ञानान!

‘‘पथ क्याह छु अवतार? युस माँदान नेरि—जल-मल करि, तस प्यमा परन! अवं, अमापोज्ज यि छुस मानान जि मनुश छु जि मनशस मंज्ज छि दयि सुँज्ज जूत्य (रेँह) प्रजलान।’’

गिरीश—(असान) तोहि वुछवुँ नुँ दयि सुँज्ज जूत्य (रेँह) जांह—

डाक्टर रूद जवाब दिनुँ ब्रॉह ओरु-योर करनि। नखय ओसुस अख दोस्त बिहिथ—ल्वति ल्वति वोन तँम्य क्याह तान्य।

डाक्टर—(गिरीशस कुन)—तोहि ति छुवुँ न गाशचि छायि वरॉय केँह ति वुछमुत।

गिरीश—बुँ छुस वुछान। जूत्य (रेँह) छुस बुँ वुछान। श्रीकृष्ण छि अवतार, यि करँ बुँ साबित, नतुँ छुनुँ पनुँन्य ज्यव चँटिथ।’’

श्री रामकृष्ण—यिमुँ गॉयि सिरिफ कथुँ बेयिँ नुँ केँह। यि सोरुय छु टायफाइड लदुँ सुँद बकवास। ब्येमारुँ सुँद बकवास। सु ब्येमार ओस वनान, ‘बुँ चमुँ यि सोरुय पाँ नोट, बुँ ख्यमुँ यि सोरुय बतुँ दीगचि।’

डाक्टरन वोनुस—‘अछा बतुँ सोरुय ख्यख। युथुय चुँ बलख अँस्य दिमोय सोरुय यि चुँ यछ्ख।’

पूरन ज्ञानुक्य छि लख्यन। अख लख्यन छु जि व्यचार (बँहस) छु गछान बंद। ग्वडुँ यि वोनुमय जि, कोच रोजनस तानी छु ग्यवस कँकरारय रोज्ञान।’’

डाक्टर—क्या माहरा पूरन ज्ञान ह्येक्या मँहन्युव हमेशि बापथ प्रॉविथ? तोह्य छिवुँ वनान सोरुय छु ईश्वर। त्येलि क्याजि तोह्य परमहंस सुजुँ कामि करान? तु यिम लुख क्याजि यिथ तुहुँज सीवा करान? तोह्य क्याजि नुँ छोपुँ कँरिथ ब्यहान?

श्री रामकृष्ण—(असुँवनि रो 'यि)—पोन्य छु अँकिसुँय डंजि रूजिथ ति पोनीय। तु तरंगुँ (लहरुँ) रूँपुँ किन्य ओरु योर हिलनुँ पतुँ ति पोनीय। तिमय छि शोद मन, तुँ शोद बोद सपदिथ अँदरुँ बिहिथ रोज्ञान। बुँ छुस यंत्र तुँ तिम छि यंत्री। ति ज्ञन गव बुँ छुस मिशीन तुँ तिम छि मिशीन चलावन वॉल्य। बुँ छुस गरुँ तुँ तिम छि मॉलिक। तिमय छि महावत नारायण (हँस्यतिस प्यठ बिहिथ हँस्यतिस रूँचि वति प्यठ पकनावान)।’’

डाक्टर—अछा अख कथ प्रिछोवुँ, तोह्य क्याजि म्ये वनान दोद कर साँ ठीक?

श्री रामकृष्ण—‘योतान्य “बुँ” रूपी नोट छु, तोतानी छु यि सपदान। वुछ (सोंच) अख बोड समन्दर छु, हेरि बोनुँ छु पानि बँरिथ। तथ मंज छु अख नोट। नँटिस अन्दर तुँ नँटिस न्यबर छु पोन्य। मगर तथ फुटरावनुँ वरॉय छुनुँ पोन्य पानवॉन्य रलान (अख सपदान) यि छु तँमिय दयन म्यॉनिस शरीरुँ रूपी नँटिस मंज ‘बुँ’ (अहं) थोवमुत।

डाक्टर—तुँ युस यि ‘बुँ’ तोह्य छिवुँ वनान, यि सोरुय क्याह छु? अम्युक माने ति प्ये यिवुँ वनुन। क्या तिम (ईश्वर) छा असि सूँत्य कँह मज्जाख करान?

गिरीश—(डाक्टरस कुन) माहरा, तोहि किथुँ पॉठ्य सपुद मोलूम जि यि छुनुँ मज्जाख?

श्री रामकृष्ण—(असुँवनि रो 'यि) यि ‘बुँ’ छु तिमवुँय असि मंज थोवमुत। यि सोरुय छु तिहुँज लीला—तिहुँज खेल। अँकिस राज्ञस आँस्य चोर गबर। साँरी आँस्य तुँ राजुँ सुँद्य ने चिव मगर तिमवुँय मंजुँ ओस

कांह वँजीर, कांह थानुँदार बँनिथ गिंदान। राजुँ सुँद्य शुर्य आँसिथ थानुँदार बनान तुँ गिंदान!

(डाक्टरस कुन) “बोज योदवय च्ये आत्म साक्षात्कार सपदिय (याने चुँ परजुँनावख पनुन असली रूफ) तु तगख माननि यि सोरुय। तिहिँदि दर्शनुँ सूँत्य छि साँरी संशय (शख) दूर सपदान।’’

डाक्टर—सोरुय संशय कति छु दूर सपदान?

श्री रामकृष्ण—म्ये निश बोज यूतुय। अमि ज्यादुँ यछ्ख कँह जानुन तुँ ति वन खलवख पॉठ्य तँस्य (परमात्माहस) तस प्रिछ, तिमव क्याजि छु यि कोरमुत।

डाक्टरन कँर छोपुँ।

श्री रामकृष्ण—अछा च्ये छुय व्यचार टोट अदुँ बोज तुँ वीदानुक व्यचार। कस तान्य राज्ञस निश ओस आमुत अख नफर जोदूगरी हावनि। सु हना दूर गँछिथ वुछ राज्ञन अख सवार छु यिवान। गुरिस प्यठ ओस रोब-दाबुँ सान, अथस मंज आँसिस हँथियार। सभायि (दरबारस) मंज बिहिथ नफरव तुँ राज्ञन कोर व्यचार जि अथ अन्दर क्याह पजर छु। सु गुर छुनुँ पोज, सु साज-बाज ति छुनुँ पोज। हँथियार ति छिनुँ पँज्य। छेकरस वुछ्ख पँज्य पॉठ्य जि सवारुँय ओस कुन जोन खड़ा बैयि नुँ कँह। याने ब्रह्म छु पोज तुँ समसार छु अपुज। व्यचार येँछिव करुन तुँ पतुँ छुनुँ ब्येयि कँह रोज्ञान।

डाक्टर—बुँति छुस नुँ अथ एतिराज करान।

श्री रामकृष्ण—अमा पोज यि ब्रम छुनुँ आसाँनी सान दूर गछान। जानुँ पतुँ ति छु रछ खंड रोज्ञान। स्वपनस मंज ति योदवय कांह सुँह छु वुछान तुँ अँछ मुचरनुँ पतुँ ति छि वॉल्लिजि दुबुराय गछान।

“कँह चूर गँय अँकिस खाहस मंज चूर करनि। तति ओस खोचनावनुँ बापथ अख आदम क्रद गासुँ तुजन हुंद पोतुल बनावनुँ आमुत। चूर आँस्य खोचनुँ मोखुँ अन्दर नुँ अचनुँय। अख गव नजदीक तुँ वुछन यि सिरिफ गासुक पोतुल। सु आव वापस तुँ वोनुन पनन्यन साँथियन जि खोचनुँच छनुँ कथ। मगर खोचनुँ मोखुँ आँस्य नुँ तिम ब्रोंह पकानुँय। वनान आँस्य वछस छि दुबरारय गछान। तव पतुँ येँम्य निशि गँछिथ गोडुँ ओस वुछमुत तँम्य तुल पोतुल तुँ सोवुन पथर तुँ वोनुन—“यि छुनुँ किही” “यि छुनुँ किही” (नेति, नेति)।’’

डाक्टर—यि छि बडुँ जबर कथ।

श्री रामकृष्ण—(असुँवुनि रोंयि)—अवुँ, किछ कथ छि?

डाक्टर—बडुँ रूच कथ।

श्री रामकृष्ण—अकि लटि वन 'थैंक यू' (Thank you) ति।

डाक्टर—क्या तोह्य छिव ना म्यानि मनुक भाव समजान? यूत कष्ट कैरिथ छुस तोहि वुछनुँ बापथ यिवान।

अज छि विजय दशमी (दशहार)। श्री रामकृष्णन वोन डाक्टरस मिठायि रछा ख्येनु बापथ। बँखत्यव अँन्य तिहिन्दि बापथ मिठायि।

डाक्टर—(ख्यवान ख्यवान) वोन्य छु सवुँ 'थैंक यू' वनान, तोहि युस वोंपदीश कोरवुँ तमि बापथ नुँ, सु थैंक यू क्याजि वनुँ लफजव सूँत्य?

ब्रसवार 22 ओक्टूबर 1885

श्याम पुकुरकिस अँकिस दुपूर मकानस मंज छु श्री रामकृष्ण सुन्द पलंग बिछावनुँ आमुत। तँथ्य प्यठ छि श्री रामकृष्ण बिहिथ। डाक्टर सरकार, ईशान चन्द्र मुखोपाध्याय तँ बँखुत्य छि ब्रोंटुकनि तँ अँद्य अँद्य बिहिथ। ईशान छु बडुँ दौनी। पेनशन रँटिथ ति छु दान करान। कर्ज ह्यथति दान करान तँ हमेशि दयि सुन्द ध्यान दौरिथ आसान। दाद्यु क हाल बूजिथ छु खबरि आमुत। डाक्टर सरकार छु यलाज करनि यिवान तँ शें सथ गंठुँ ब्यहान। श्री रामकृष्णस प्यठ छि तिमन बडुँ श्रद्धा तँ बँखत्यन छि पनुँन्य अंग-आँशनाव व्यंदान। शामुचि सथ बजे छि। न्यबर छु जूनुँ गाश। अँदरुँ छु चोंग दजान। फल चँन्दुक गाश तँ जन छु न्यबुँर्य किन्य अम्रेतुँ वरुँन करान।

ईशानस वुछिथ छि श्री रामकृष्ण वनान—“युस समसौरी जौन (ग्रेहस्थी) दयि सुँद्यन पादि कमलन हुँज भक्ति कैरिथ दुनियाहस मंज कॉम करान छु, सु छु बाग्यवान, सु छु बोहँदुर। सु छु त्युथुय युथ जन अख नफर कलस प्यठ जूँ मन बोर व्यतरान तँ यपौर्य बरॉच हुँद तमाशि वुछान। यपौर्य कलस प्यठ यूत गोब बोर मगर हुपौर्य बरॉच हुँदि तमाशुक लुतुफ तुलान। यिथुँ पॉठ्य संसारस मंज रोजुन छुनुँ बगौरि स्यटाह आध्यात्मिक (रूहौनी) ह्यकत आसनुँ वराय मुमकिन। यिथुँ पॉठ्य 'पाकाल गाड' रोजान तँ छि रबि मंज। मगर पानस छस नुँ रछ ति रब लॉर आसान। 'पनडुब्बी' (अकि कँस्मुक बतुख) छु—पॉनिस मंज गोतुँ-गोतुँ करान, मगर अकि लटि पखुँ दँननुँ पतुँ छुनुँ तस अख रछ ति पोन्थ लोर आसान।

“चुँ जन प्रिछख, ग्रेहस्थ आश्रमकिस जौनी तँ संन्यास आश्रमकिस जौनियस मंज छा कांह फरुख किनुँ न, तँ तम्युक जवाब छु यि जि दोशवय छि दर असुँल कुनिय। यिति छु जौनी तँ हुति छु जौनी; अमापोज यीच हना छु जि संसारस मंज छु ग्रेहस्थुँ जौनीयस अख बयि रोजान। कामिनी तँ कांचनस (जनि तँ जरस) मंज रोजनुँ सूँत्यी छु केंह नतुँ केंह बयि रोजान। तोह्य आँस्यतव कोताह ति बोदिमान (अकैल मंद) मगर चुँनि कुठिस मंज रोजनुँ सूँत्य छु शरीरस मंज रछखंड क्रिहुन दाग लगनुँय।

दानि येलि बुजनुँ छु यिवान तँ जुँ चोर लायि फँल्य छि बछि मंजुँ वोठ दिथ न्यबर नेरान तिम छि चमेली हुँदि पोशिक्य पॉठ्य सफेद आसान। शरीरस प्यठ नुँ अख रछ ति दाग। यिम दानुँ क्रायि मंज छि आसान, तिम ति छि जान आसान। मगर तिमन न्यँबरिम्यन दानन हिव्य नुँ आसान, पानस छुख केंह दाग लोर आसान। समसार त्रॉविथ संन्याँस्य योदवय ज्ञान प्रावान छु, सु छु बिल्कुल चमेली पोशिक्य पॉठ्य बेदाग आसान तँ ज्ञानु पतुँ समसारुँ रूपी क्रायि मंज रोजनस प्यठ छुस शरीरस प्यठ केंछा वोचुल दाग लारान। (सौरिय असान)

“केंह ति आँस्यतन समसारस मंज रोजन वॉलिस जौनियस लंग्य पानस दाग मगर तमि सूँत्य छुनुँ तस कांह नोकसान सपदान। चँद्रमस मंज छु कलंक (दाग) मगर तमि मंजुँ नेरनस मंज छुनुँ किरनन (जुँचन) कांह मुशिकल सपदान।

डाक्टर—इन्द्रिय प्यठ कंट्रोल करुन छु बडुँ सख। गुरिस छि दोशवुँन्य अँछन (दँछिन खोहँवुँर्य) पचि गंडनुँ यिवान। काँसि गुरिस छि बिल्कुल अँछन प्यठ पॅट यिवान गंडनुँ।

श्री रामकृष्ण—अगर अकि लटि ति तिहिँज कृपा सपदि, अकि लटि ति योदवय ईश्वर सुंद दर्शुन सपदि, आत्माहुक साख्यात्कार सपदि, तँ त्ये'लि छुनुँ कांह बयि रोजान। शनवय दुश्मन छिनुँ पतुँ केंह ह्यकान कैरिथ।

“नारद तँ प्रहलाद हिव्य नित्य स्यद महापोरंशन तिथुँ पॉठ्य दोशवुँन्य अँछन पॅट गंडनुँच आँस नुँ जोरूरथ। युस शुर पानय माल्य सुंद अथुँ रँटिथ खाहस मंज बेरि प्यँठ्य पकान छु, सु छु मुमकिन जि लापरवौही किन्य मॉल्य सुंद अथुँ त्रॉविथ गछि दोबस मंज। अमापोज मोल यस शुर्य सुन्द अथुँ रँटिथ आसान छु सु छुनुँ जांह ति दोबस फटान।”

डाक्टर—मगर मोल रटि शुर्य सुन्द अथुँ यि छुनुँ जान।

श्री रामकृष्ण—ति छनुं कथ। महापोरशन हुंद स्वबाव छु शुर्यन हुन्द ह्यु आसान। ईश्वरस निश छि तिम प्रथ विजि शुरिय आसान। तिमन मंज छुनुं अहंकार। तिहुंज सौरुय शक्ति छि ईश्वरुं सुंज शक्ति। मॉल्य सुंज शक्ति। पनुंन्य नुं किंही शक्ति। यिय छु तिहुंद द्रड विश्वास।

डाक्टर—गुरिस दोशवुय अन्दव अछन पॅट गंडनुं वरॉय छा जाँह गुर ब्रोंह नेरुन यछान? दुशमनन वशस मंज करनुं वरॉय छा जाँह ईश्वर लबनुं यिवान?

श्री रामकृष्ण—चुं यि वनान छुख, तथ छि व्यचार मार्ग वनान—ज्ञान यूग। तमि वति ति छु ईश्वर मेलान। ज्ञानी छि वनान, ग्वडुं छु चित शोद सपदुंनुच जोरूरथ। ग्वडुं गछि साधना आसुंन्य तेलि छु ज्ञान सपदान।

“भक्ति मार्गु किन्य ति छि तिम मेलान। योदवय दयि सुंघन पादि कमलन मंज अकिलटि भक्ति आसि, योदवय तिहुंद नाव ह्यनस मंज दिलि लागि, तुं पतुं छनुं तस यन्द्रियन वशस मंज करनुं च कूशिश प्यवान करुंन्य। दुशमन छि पॉन्य पानय कोबू गछान।

“योदवय काँसि पोतरु शूक आसि, तुं तमि दोहुं कर्या सु काँसि सूत्य लडॉय या सालस गछ्या कुन? सु कर्या लूकन ब्रोंहकनि अहंकार या सोख तुल्या कोलियि सूत्य?

“क्येम्य योदवय कुनि अकि लटि गाश वुछन तव पतुं रोजनुं जाँह तिम अनि गॉटिस मंज?

डाक्टर—(असन त्रायि) चाहे दँज्यतन तोति त्रावन नुं गाशस!

श्री रामकृष्ण—न साँ, बँखुंत्य छिनुं क्येम्य सुंघ पाँठ्य दँजिथ मरान। बँखुंत्य यथ गाशस वुछिथ पतुं लारान छि, सु छु रँतनुक गाश आसान। रँतनुक गाश छु स्यठा जोतवुन आसान मगर छु स्यठाह प्रेयिवुन तुं शुहुल आसान। अमि गाशि सूत्य छुनुं शरीर दजान। अमि सूत्य छु आनन्द तुं शाँती मेलान।

“व्यचारुं—मार्ग किन्य—ज्ञानयोगकि मार्गु सूत्य ति छि तिम मेलान। अमापोज यि वथ छि बडुं मुश्किल। बुं न छुस शरीर, न मन, न बुद्धि, मनस मंज न छु रूग। न शूक, न अशान्ति (बेचैनी), बुं छुस सच्चिदानन्द स्वरूप, बुं छुस सोख तुं दोखस निश अलग। बुं छुस नुं इन्द्रियन हुंदिस वशस मंज यिछुं कथुं आँसुं सूत्य वननि छि सँहल। अमापोज वरतावनस मंज अननि या

अमिच धारना करुंन्य छि स्यठाह मुश्किल। मॉन्यतव कंडि सूत्य छु अथस जखुंम सपदिथ दारि रथ वसान, मगर वनव कोँड कति छु चामुत? बुं हय स्यठा ठीक छुस।’ यिमुं कथुं छनुं शूबान। गोडुं पजि सु कोँड ज्ञानुंकि नारुं सूत्य जालुन, किनुं न?

डाक्टर—(बँखत्यन कुन) किताब परनुं सूत्य सपदेह नुं यिमन (श्री रामकृष्णस) यूत ज्ञान। फेरडे (अख सायनसदान) ओस पानुं कोदरतुक दर्शुन करान। (याँनी कोदरतस सूत्य कथुं करान)। सुय छु कारन जि तँम्य कॅर्य वार्याह साईनसी पजर नँन्य। किताबी ज्ञान सपदनुं सूत्य होकिहेनुं यूत सपदिथ। गणित (हिसाबुंक्क्य) नियम छि देमाग डालान (मचर तुलान) बुन्ययादी छांडव करनस मंज छि तिम ठोर बनान।

श्री रामकृष्ण—(डाक्टरस कुन) येलि बुं पंचवटी मंज जमीनस प्यठ डुलुंन्य दिथ माजि ओसुस नाद लायान—त्येलि ओसुम माजि वॉनमुत, मॉज्य म्ये हाव यि सोरुय युस कर्मियव कर्म कॅरिथ लोब, यूगियव यूगुं जॅरियि, तुं ज्ञानियव ज्ञानुं जॅरियि लोब। बेयि ति वार्याह कथुं छि, तिमन मुतलख क्याह वनुं वॉन्य?

“म्ये पॅर नुं अख ति किताब। पगर वुछिव माजि हुन्द छुस नाव ह्यवान, अवय छि साँरी म्ये मानान। शम्भु मॉलिकन ओस म्ये वॉनमुत—‘न छय डाल तुं न तलवार तुं बन्योख शान्ति रामसिंह।’ (साँरी असान)

(डाक्टरस कुन)—यूत समजुनुय छु मुश्किल जि तिमय छि ‘स्वराट’ तुं तिमय छि ‘विराट’। यिहुंज नित्यता छि (याने यिम प्रथ विजि छि) तिहुंजुंय छि लीला ति। ‘तिम ह्यकन नुं इनसान बॅनिथ’ यि ह्यकवा अँस्य पननि लोँकचि अकलि सूत्य वॅनिथ? सानि लोँकचि अकलि मंज होँक्या यिमन सरिनुंय कथन हुंज धारना सपदिथ? अख सेर यथ बानस वाति, तथ मंज ह्यकवा चोर सेर दोद बॅरिथ?

“अवय किन्य यिमव साधु तुं महात्माहव ईश्वर लोँबमुत छु तिहुंजुंय कथन प्यठ गछि पछ करुंन्य। साधु—महात्मा छि दयि सुंजुय चिन्तना करान रोजान, यिथुं पाँठ्य वकील मुकदिमुँच फिकिर ह्यथ।

“सरल (स्योद) आसनुं वरॉय छुनुं काँसि ति ईश्वरस प्यठ विश्वास सपदान, विषय बुद्धि (ति गव दुनियादारी हुंजि अकलि) निश छु दय स्यठा दूर। विषय बुद्धि रोजनस प्यठ छि स्यठाहि प्रकॉर्य संशय हॉजिर गछान। तुं

वार्याहि कॅस्मूक्य अहंकार यिवान, गाटुंजारुक अहंकार, दौलतुक अहंकार, वगॉर, वगॉरु। मगर यिम (डाक्टर) छि स्येंघ।

श्री रामकृष्ण—(डाक्टरस कुन) साधन हुँज संगत छि ज़ोरूरी। समसॉरी लुकन छुँ ब्यमॉर्य ऑसिथुँय। साधन हुँदि उपदेश मुताबिक पज्जि कॉम करुँन्य। सिरिफ बोज़नुँ सूँत्य क्याह अंदि? दवा प्येयि ख्योनं, ख्यनस-चनस ति प्येयि परहेज करुन। तमि विज्जि छु पथ्य (परहेज) बडुँ ज़ोरूरी।

डाक्टर—परहेजुँ सूँती छु दोद बलान।

गिरीश—(असनुँ सान, डाक्टरस कुन)—तोहि वोट त्रें चोर गंटुँ येँत्यथ बिहिथ, ब्यमारन यलाज करनुँ बापथ गॉछिव ना?

डाक्टर—कति रूज्ज डाक्टरी तुँ कति रूज्ज ब्यमार। हे यिथिस परमहंसस सूँत्य हय आवरनुँ आस, जि म्योन सोरुय गव अँमिसुँय अन्दर स्वाहा! (सारिवुँय ओंस)

(मास्टर, गिरीश तुँ दोयिम्यन बॅखत्यन कुन)—“दोस्तव, तोह्य जॉनिव म्येति पननुँय—यि छुसवु नु बु डाक्टर आसिथ वनान। योंदवय तोह्य म्ये पनुन जॉनिव त्यैलि छुस बुँ तुहुन्दुय।

(श्री रामकृष्णस कुन) तोहि युस दोद छु तथ छु लुकन सूँत्य कथुँ करनस ठाख। मगर यैलि बुँ यिमुँ त्यैलि ह्यैकिव ज़ोरू म्येँ सूँत्य कथुँ कॅरिथ। (सॉरी छि असान)

श्री रामकृष्ण—यि बेंमार्य कॅरिव ठीक, बु छुस नुँ तिहुन्द कीर्तन कॅरिथ तुँ नाव ह्यथ ह्यकान।

डाक्टर—ध्यान करनुँ सूँतिय छु मकसद पूरुँ सपदान।

श्री रामकृष्ण—यि किछ कथ? बुँ क्याजि पकुँ अँकिसुँय लंजि थफ कॅरिथ? बुँ छुस कुनि विज्जि पूजा करान, कुनि जफ, कुनि ध्यान, कुनि तिहुँद नाव स्वरान तुँ कुनि तिहुन्द गोन ग्येँव्य ग्येँव्य नचान।

डाक्टर—बुँति माहरा छुस नुँ अँकिसुँय रज्जि थफ कॅरिथ।

श्री रामकृष्ण—चोन न्येँचुव अमृत छुनुँ अवतार मानान। मगर अथ मंज छुनुँ कांह दूश। ईश्वरस निराकार मॉनिथ अगर तिमन मंज विश्वास रोज्जि तोति छि तिम मेलान। योंदवय साकार मॉनिथ तिमन मंज विश्वास आसि तोति मेलन तिम। तिमन मंज विश्वास रोज्जुन तुँ पनुन पान तस अर्पन करुन यिमुँ ज़ुँ कथुँ छि ज़ोरूरी। मोहन्युव छु अज्ञानी, तस छि गल्ती गछुँनिय। यथ बानस

अख सेर दोंद वाति तथ ह्येँक्या चोर सेर बरनुँ यिथ। मगर यथ ति वति प्यठ रूज्जिव, व्याकोल सपदिथ गछि तिमन नाद लायुन। तिम छि अन्तर्यामी—तिम बोजन अँदर्युम आलव। व्याकोल सपदिथ चाहे साकारवादी सुंजि वति गॉछिव चाहे निराकार वादी सुंजि वति तिमनुँय प्राँविव।

मोंदुर चोट (पूर) चाहे स्येँद पॉठ्य ख्येँयिव चाहे होंल पॉठ्य ख्येँयिव सों लमि मोंदरुँय।

“चोन न्येँचुव अमृत छु बडुँ ज़बर लडकुँ।”

डाक्टर—सु छु तुहुँदुय च़ाठ (चेलुँ)

श्री रामकृष्ण—(असान) कांह मायलुँ छुनुँ म्योन चेलुँ-वेलुँ केंह। बुँ छुस पानय सारिनुँय हुँद चेलुँ। सॉरी छि दयि सुन्द शुर्य, ईश्वरुँ सुँघ दास—बुँति छुस ईश्वरुँ सुन्द शुर; ईश्वर सुँद दास चन्दा मामा छु सरिनुँय हुन्द माम। (सॉरिय छि असान)

बटुँवार, 24 अँक्टूबर 1885

दुहचि अख बजे हिशि आसहन। नरेन्द्र, महिमाचरण, मास्टर तुँ डाक्टर सरकार बेतरि बॅखत्यन सूँत्य छि श्री रामकृष्ण श्यामपुकर किस दुपूर्य मकानुँ किस कमरस मंज बिहिथ। दुहचि अख बजे ह्यू वख आसिहे।

श्री रामकृष्ण—(डाक्टरस कुन) चोन यि (होमोपैथी) यलाज छु जान।

डाक्टर—यथ मंज छि दादिक्य लख्यन किताबि मंज लीखिथ लख्यनन सूँत्य मिलनावनुँ यिवान। यिथुँ पॉठ्य अंग्रीज्य संगीत छु बाजि बजावनुँच लिपि पॅरिथ ग्यवनुँ यिवान।

“गिरीश घोष कति छु?—मगर थँविव। म वॅन्यूस सु ओस रॉत्य रातस हुश्यारुँय।”

श्री रामकृष्ण—अच्छा, समाधि भावस मंज छुम बंगि हुन्द नशि ह्यू खोंतमुत आसान, यि क्याह छु?

डाक्टर—(मास्टरस कुन)—नॉरन छि पनुँन्य मूल आसान तिम छि अमि विज्जि रूज्जिथ गछान। इसलिए छु मोंटुन ह्यू गछान। यपॉर्य छि खोरं नटान तिक्याजि सोरुय ताकथ छु मगज्जन (द्येँमागस) कुन गछान। अमी नॉरन हुँदि चँखरुँ किन्य छि जिदंगी। गरदनि निश छु मेडूला आबलांगेता (Medulla oblongata), अथ नोखसान वातुन जॉनिव जिन्दगी हुन्द चोंग छ्यतुँ गछुन। श्रीयुत महिमाचरण चक्रवर्ती छि सुषमना नॉडी अन्दर कुंडलिनी शक्ति

हुंज कथ वनान—‘मेरु दंडस अंदर छें सूक्ष्म भावस मंज सुषमना नावुंच अख नाँडी। अथ छुनुं कांह वुछिथ ह्यकान। यि छु महादेव सुन्द वाख।’

डाक्टर—शिव जियन कॅर मनशि सुंज परीक्षा (इम्तिहान) तसुंदि पूरन अवस्थायि मंज। मगर यूरोपियनव कॅर मनशि सुंज परीक्षा गर्भ अवस्थायि प्यटुं पूरन अवस्थायि तान्य सारिनुंय मंज। अँमिकि मुकाबलुं कॅरिथ हिस्ट्री समजिन्य छि जान। भीलन हुंज हिस्ट्री पॅरिथ छु नानान जि कॉली ऑस भीलनी, तमि ऑस खूब लडॉय (जंग) कॅर्यमुंत्य।

‘‘तोंह्य मुँ अँसिव, बूजिव जीवन हुंदि शरीरुंच विद्या (Anatomy) हुन्द मुकाबलुं कॅरिथ समजुंनुं सूंत्य कोताह फॉयदुं वोत। गोंदुं ओस नुं श्रोपरावन ताकत पाँदुं करन वोल रस तुं बेयि चोकिरुं पाँनिस मंज ओस नुं फरुंख तरान फिकिरि। पतुं कोर क्लाड बरनार्डन खरगोश सुंदिस म्यादुं, चर्वन (लिवर) तुं बेयन हिसन हुंद इम्तिहान तुं वुछुन पित (चोकिरुं पोन्य) तुं श्रुपरावनुक ताकत पाँदुं करन वोल रस छु ब्योन ब्योन। अमि सूंत्य छु यि स्यद सपदान जि लोँकट्यन-लोँकट्यन जीवन कुन ति पजि असि ध्यान द्युन। सिरिफ मनशस कुन वुछुनुं सूंतिय अन्दि नुं।

‘‘यिथय पाँठ्य छु धर्मन हुन्द मुकाबलुं कॅरिथ समजिनुं सूंत्य ति फॉयदुं वातान।

‘‘यिम (श्री रामकृष्ण देव) यि केंह छि वनान, दिलस प्यठ क्याजि छु तम्युक ज्यादुं असर प्यवान? साँरी धर्म छि यिमव वुछमुंत्य। हिन्दू, मुसलमान, ईसाई, वैष्णव, शाक्त, साँरी धर्म छि यिमव पानुं साधना कॅरिथ वुछमुंत्य। मांछ तुँलुर थैलि वार्याहव पोशव प्यटुं व्यूर तुलिथ मांछ छि जमाह करान त्येली छु तसुँदिस मांछ गनस मंज जबर तुं जान माछ तयार सपदान।’’

श्री रामकृष्ण छि नरेन्दरस ग्यवनुं बापथ वनान। नरेन्दर छु ग्यवान—
ग्यवुन— हे राजु राजेश्वर, दर्शुन दियिव। बुँ छुस तुहुँजि करुणा (दयायि) हुंद तलबगार, म्यें कुन कॅर्यतव मेँहरुंच अख नजर। बुँ छुस तुहुँद्यन पादन पनुँन्य यिम प्राण आलवान, मगर यिम ति छि समसारुँकिस अँगुं (नारुँ) कौंडस मंज दजान...।

हाय, म्याँन्य वॉलिंज छि पापन मंज फॅटमुँच, मायायि वॅजमुँच, बुँ छुस बस मूदमुत। ही दया सागरुँ! म्याँन बेहोश आत्मा करुन हुशार तथ छख पननि दयायि हुंद जिन्दुं करन वोल अम्रैथ।

श्री रामकृष्ण—बेयि सु बाँथ—‘‘यि केंह छु सोरुय छुख चुँय।’’

डाक्टर—अहा!

नरेन्दरन ग्योव सु बाँथ।

डाक्टर गव मुहिथ। केंचि कॉल्य वोन डाक्टरन गुल्य जुं गंडिथ भक्ति भावुं सूंत्य श्री रामकृष्णस—दियिव माहरा अज इजाजथ। पगाह यिमुं बेयि।

डाक्टर बड्यव। सन्ध्यायि पतुं खोत चँदरमुं। अज छि बटुंवार। हरदुं पुनिम हुंद दोंयुम दोंह। श्री रामकृष्ण वँथ्य थोद समाधि मंज छि मगन। नित्यगोपाल छि तिमन निश भक्ति भावस मंज खडा।

श्री रामकृष्ण बीठ्य। नित्य गोपाल छि खोरन मोठ दिवान। कालीपद, देवेन्द्र बेतरि बखुँत्य छि ब्रोंदुं कनि बिहिथ।

रातस करन केंह बालक-भक्त वारि वारि हुशयार रूजिथ श्री रामकृष्ण सुंज सीवा। अज रातस रोजि मास्टर ति येती।

आथवार, 25 अँक्टूबर 1885

श्री रामकृष्ण देव सुंज खबर दिनु बापथ जि सु क्युथ छु ओस मास्टर दोंहय गछान। अज सुबहस साडि शैयि बजि प्रणाम कॅरिथ पृछ मास्टरन—‘‘तोंह्य किथ्य छिवुँ? क्याह छवुँ खबर?’’ श्री रामकृष्ण छि वनान’’ डाक्टरस वँन्यजि। पँतिम पँहरन छुम ऑसस मंज पाँ गँल्य बँरिथ यिवान; चास छम। प्रिछ्यज्यस श्रान करा, किनुं न?

सति बजि पतुं समख्यव मास्टर डाक्टरस तुं वोनून तस सोरुय हाल। डाक्टरस निश ओस बुडुं मास्टर जी तुं अख-जुं यार तति बिहिथ। डाक्टरन वोन बुडुं मास्टर जियस ‘माहरा, त्रैयि बजि राँच प्यटुं वोत म्यें परमहंस सुंज फिकिर, न्यँदुँर आयम नुं, वुनि ति छम परमहंसुं सुंज फिकिर।’ (साँरी छि असान)

डाक्टर सुंघ यार छि डॉक्टरस वनान, ‘‘माहरा, म्यें छु बूजमुत कांह कांह छु तिमन अवतार वनान। तोंह्य छिवोख दोंहय वुछान, तोंहि क्याह छुवुं बासान?’’ डाक्टरन वोन, ‘‘मनुंशि नजरि छुस बुँ तिहुँज स्यटाह भक्ति करान।’’

मास्टर—(डाक्टर सुँदिस यारस कुन)—डाक्टर साब छि बडु दया (मेंहरबॉनी) कॅरिथ तिमन यलाज करान।

डाक्टर—मेंहरबॉनी कॅरिथ?

मास्टर—बुँ छुस नुँ वनान श्री रामकृष्ण देवस प्यठ, असि लूकन प्यठ छिवुँ तोह्य मेहरबानी करान।

डाक्टर—न साँ, तिति नुँ, तोह्य छिवुँ नुँ जानान। दरअसल छु म्येँ नौकसान सपदान। जुँ, त्रें ब्यमार छुस बुँ दोहय वुछनुँ निशि रोजान, छुस नुँ ह्यकान गँछिथ। दोयमि दोह छुस योरय गछान तँ फीस छुस नुँ रटान। पानय गँछिथ रटँति किथुँ पाँठ्य फीस?

डाक्टर यिनुँ बापथ वनिथ आव मास्टर वापस।

बतुँ वतुँ ख्यथ दुहचि त्रैयि बजि मील्य तिम श्री रामकृष्णस तँ वन्यनख सार्यय कथुँ-वथुँ।

मास्टर—म्येँ वोन तिमव, 'अजरातस गँयि म्येँ त्रैयि बजिय न्यँदुरेँ गाँब तँ तनुँ प्यठय छुस श्री रामकृष्ण सुंद ध्यान करान।' येँमि विजि बुँ समख्योस तिमन वख ओस आँठ बजे, तँ तिमव वोन 'वुनिति छुस बुँ श्री रामकृष्ण सुन्द ध्यान करान।'

श्री रामकृष्ण—वुछ चुँ छुख जानान, सु छु अंग्रीजी पो'रमुत ल्यूखमुत, तस ह्यकव नुँ यि वनिथ जि चुँ कर म्याँन्य फिकिर। अमा पोज यि गव जबर जि सु छु पानय करान।

मास्टर—पतुँ वोन तिमव, 'बुँ छुस नुँ तिमन अवतार वनान, अमापोज मनोश जानिथ छेँ म्येँ तिमन प्यठ सारिवुँय खोतुँ ज़्यादुँ भक्ति।'

श्री रामकृष्ण—बेयि केँह कथ सपजुँ?

मास्टर—म्येँ वोनख, 'अज कया छु करन दाँदिस मुतलख बोँदबस्त? डाक्टरन वोन—बोँदबस्त म्याँन्य कलुँ हीर। म्येँ प्येयि बेयि गछुन तँ बेयि कयाह?' (श्री रामकृष्णन त्रोव असुना) तँ बेयि वोनख, 'तोहि छव नु पताह, म्येँ कोताह छु पोसुँ रँग्य प्रथ दोहँ नौकसान सपदान। बुँ छुस नुँ दोन त्रन जायन ह्यकान वाँतिथुँ।'

केँचि कॉल्य आय विजयकृष्ण गोस्वामी श्री रामकृष्ण देवुन दर्शन करनुँ बापथ। सूँत्य छिख केँह ब्राह्म भक्त ति। विजय कृष्ण आँस्य वार्याहन दोहन ढाका हस मंज। यपाँर्य पछुम किन्य वार्याहन तिर्थन हुँज यात्रा केँरिथ छि कमुँय काल, ब्रौठ कलकता आमुँत्य। यिथुँय कोर तिमव श्री रामकृष्णस पादि प्रणाम। वार्याह लुख छि हाँजिर—नरेन्दर, महिमाचरण चक्रवर्ती, नवगोपाल, भूपति, लाटू, मास्टर, लोँकुट नरेन्दर बेतरि वार्याह भक्त।

महिमा चक्रवर्ती—(विजयस कुन)—माहरा, तोह्य आँवुँ तीर्थ केँरिथ; वार्याह दीश वुछिथ आँवुँ, वोन्य वन्यतव क्याह क्याह वुछवुँ।

विजय—क्याह वनोवुँ? बुँ छुस अनुँबव (मोहसूस) करान जि येँत्यथ वुन्यक्यस बिहिथ छुस येँतिथुँय छु सोरुय केँह। ओरुँ योर फेरुन छु फोँजूल। तँ बुँ येँत येँत गोस कुनि कुनि म्यूलुम युहुँद (श्री रामकृष्ण सुंद) अख आनुँ, कुनि जुँ आनु, या चोर आनुँ खंड बस, मगर पूरुँ शुराह आनुँ मीलिम सिरिफ येँत्यथुँय।

महिमा—तोह्य छिवुँ ठीक वनान। पतव छि यिमय चकर लगावनावान तँ यिमय छि बेहनावान।

श्री रामकृष्ण—(नरेन्दरस कुन)—वुछ, विजयस कोसुँ दशा छि गाँमुँच। लख्यन (अलामँच) छिस साँरी बदलेमुँत्य, ज़न तँ ग्रख दिथ (दोद) छु। बुँ ह्यकुँ परमहंस सुंज गरदन तँ कलुँ हीर वुछिथ वनिथ जि सु छा परमहंस किनुँ न।

महिमा—माहरा, तोहि छा वोन्य ख्यन कम कोरमुत?

विजय—अवुँ, जाँहिरा छु कम गोमुत। (श्री रामकृष्णस कुन) तुहुँदि दाद्युक हाल बूजिथ आस बुँ तोहि वुछनि। तमि पतुँ ढाका हस मंज—

श्री रामकृष्ण—क्या?

विजयन द्युत नुँ कांह जवाब। केँचस कालस केँरुन छोँपुँ।

विजय—अगर पननिस पानस यिम (श्री रामकृष्ण) पानुँ रटुँनावन नुँ, तोतान्य छु रटुन मुश्किल। यती छु शुराह आनुँ (गाश)

श्री रामकृष्ण—केदारन वोन, 'दोयमि जायि छुनुँ ख्यनुँ बापथ मेलान, मगर येँत वाँतिथुँय छि यड बेरिथ यिवान'।

महिमा—यडुँय आँच छनुँ बेरिथ यिवान। अमापोज यूत छु मेलान जि यँड छुनुँ वातानुँय प्येँठ्य छु नेरान।

विजय—(गुल्य जुँ गँडिथ, श्री रामकृष्णस कुन) 'तोह्य कम छिवुँ, यि परजुँनोव म्येँ, वोन्य छुनुँ वनुन केँह।'

श्री रामकृष्ण—(भावस मंज गँछिथ) अगर ती छु, तँ आँसिन।

विजयन वोन, 'म्येँ तोर फिकरि।' यि वनिथ प्येय श्री रामकृष्णस खोरन प्यठ। तँ रँटिन तिहिँद्य खोर वछस सूत्य। श्री रामकृष्ण छि गँहरुँ समोज मंज। तस्वीर ह्यू मोँटुन ज़न।

बँखुँत्य आँस्य यि अँजीब नजारुँ वुछिथ हय बुँगु। काँसि ओस अँछिव

किन्य ओंश वसान तू कांह ओस तोता-पाठ करान। यस युथ भाव ओस सु ओस तिथय पॉठ्य (तमी भावुं) श्री रामकृष्णस कुन वुछान। कांह छु तिमन परम भक्त वुछान, कांह साधु, कांह शरीर दौरिथ साख्यात ईश्वर आमुत (अवतार दौरिथ), यसुन्द युथ भाव।

महिमा चरण लोग ग्यवनि। ग्यवान ग्यवान आस अँछन मंज ओंश— 'वुछिव, वुछिव लोलुं मूरथ।' तू मंजुं लँग्य अमि भाव सूँत्य शलूख दोहरावनि ज्ञन तू ब्रह्म सुन्द साख्यात दर्शुन छि करान—'तुरीयं सच्चिदानन्दं द्वैताद्वैत विवर्जितम्।'

नवगोपाल लोग वदनि। अँक्य दौयिम्य भक्त भूपति हन ग्योव।

ग्यवुन—ही परम ब्रह्म, चॉन्य जय आँसिन, चुँ छुख अपार, अगम्य, परात्पर, म्यें दि ज्ञान, भक्ति तू प्रेम दिम तू पनन्यन पादि कमलन मंज दिम जाय।

बडुं चीर्य फीर्य श्री रामकृष्ण योर कुन प्रकँच मंज।

श्री रामकृष्ण—(मास्टरस कुन) आवेशस मंज छुनुं पताह जि क्याह छु गछान। वुन्यक्यन छम मंदछ यिवान। तिम सातु जन तू छुम भूत प्यटुँ आसान। 'बु' छुस नुं पतुं 'बुँ' रोज्ञान।

अमि अवस्थायि पतुं छनुं ग्रंद यिवान गँजरुनुं। गँजरुनि लगव तू 1,7,9 यिथुँ पॉठ्य छि गँजरान।

नरेन्दर—यि छुँ अवेँ किन्य ति क्याजि सोरुय छु कुनुय।

श्री रामकृष्ण—न, यि छु अख तू जुँ हस निशि स्यठाह दूर।

महिमा चरण—आहन माहरा, द्वैताद्वैतविवर्जितम्।

श्री रामकृष्ण—तति छु तर्क-व्यचार नष्ट सपदान। पँडितौजी किन्य छुनुं कांह तिमन प्रॉविथ ह्यकान। तिम छि शास्त्रन, वीदन, पुरानन तू तंत्रन निशि थोंद अलग।

यिमुँ सार्यय कथुँ आसुँ सपदान जि श्री रामकृष्णस मुलाहजुँ करनि बापथ आव डाक्टर तू ब्यूठ पननि जायि। तिम लँग्य वननि, 'राथ रोतलि त्रैयि बजि प्यटु छनुं म्यें न्यँदरुय यिवान। बस चॉनी आँसुँम फिकिर जि युथ नुं च्यें सरदी पोरिय। बेयि ति ओसुस बुँ वार्याह केंह सोचान।'

श्री रामकृष्ण—म्यें वॉच चास यिवान। हँटिस छुम वरुँम बासान। सुबहनस पँतिम पँहरन आम आँसस मंज पोन्य बँरिथ। म्यें छु सोरुय पान फुटमुत ह्यु बासान।

डाक्टर—सुबहस माहरा बूजुम यि सॉरुय शेंछ।

महिमाचरण छु पननि यात्रायि हुँज शेंछ बोज्ञनावान योसुँ तिमव हिन्दुस्तानक्यन वार्याहन जायन हुँज कँरमुँच आँस। बेयि वोनन जि लंकायि मंज छुनुं कांह ति असान द्रींठ्य गछान। डाक्टर सरकारन वोन, 'अवेँ आसि, मगर सु प्येयि छांडुन।' (सारिवुँय त्रौव असुन)

वोन्य चलेयि डाक्टरी कामि हुँजुँ कथुँ।

श्री रामकृष्ण—(डाक्टरस कुन) वार्याहन हुंद खयाल छु जि डाक्टरी छि बाकुँय काम्यव खोतुँ थँज जाय। योंदवय रोपयि रटनुं वरॉय दोंयम्यन हुंद दोंख वुछिथ कांह करि यलाज त्येलि छु सु बोंड मोहन्युव। तसुँज काँम ति छि बडुँ थँज। नतुँ यिम लूख रोपयि रँटिथ छि यि काँम करान, तिम छि बेरंहम गछान बनान। पेशि किन्य छु गँस मुँथुँर वुछुन कमजाथन हुँज काँम।

डाक्टर—महाराज, तोंह्य छिवुँ बिल्कुल ठीक वनान। डाक्टरुँ सुन्दि बापथ छु पँज्य पॉठ्य अमि बावुँ किन्य काँम करुँन्य बिल्कुल गलथ। मगर तोंहि ब्रोंटुँ कनि क्याह वनुँ बुँ पननि चाँटि—

श्री रामकृष्ण—अवेँ, डाक्टरी मंज योंदवय बेगरज पॉठ्य दोंयिम्यन वोंपकार यियि करनुँ, सु गव ज्यादय रुत।

चाहे योसुँ काँम मनोश करि, समसॉरी मनशि सुन्दि बापथ छु मँज्य-मँज्य सादन हुँज संगत स्यठाह जोरुँरी। ईश्वरस मंज भक्ति आसनुँ पतुँ छि लुख साधन हुंद संग पानय छांडान।

डाक्टर—अज छुना ग्यवुनाह केंह?

श्री रामकृष्ण—(नरेन्दरस कुन)—केंह ग्येँविव।

नरेन्दर छु ग्यवान, अथस मंज छु तान पूरुँ रँटिथ। अज छु बाजि ति वज्ञान।

ग्यवुन—माँ! म्यें कर पागल, ज्ञान तू व्यचारुँच छनुँ अज कांह जोरुँरथ...।

ग्यवनस सूँतिय लोग अजीब नजारुँ द्रींठ्य गछनि—भावुकिस आवेशस मंज छि सॉरी बँखुँत्य पागल सपदान। पंडित गँय पननि पँडितौजी (गाटुँजारुक) अहंकार त्रॉविथ खडा। वनान छि—'मॉज्य (भगवती) म्यें कर पागल, ज्ञान तू व्यचारुँच छनुँ अज कांह जोरुँरथ।' सारिवुँय ब्रोंह गव आसन त्रॉविथ भावकिस आवेशस मंज विजय खडा; पतुँ श्री रामकृष्ण। श्री रामकृष्णस गव शरीरुक तकलीफ तू दोद बिल्कुल मँशिथ। ब्रोंटुँ कनि छु डाक्टर। तिम गँय थोंद

वैथिथ । न छु ब्यमारस होश तूँ न छु डाक्टरस । ल्वकटिस नरेन्द्रस तूँ लाटू हस दोश्वैन्थ सपुँज भाव समाधि । डाक्टरन छु साईनस पोरमुत । मगर यि अजीब अवस्था वुछिथ ग्व कोल तूँ रूजिथ । वुछुन, यिमन भावुक आवेश छु तिमन छुनुँ न्यैब्युम ज्ञान बिल्कुल ति रूदमुत । सारी छि रूजिथ तूँ बदलुँय अवस्थायि वॉत्यमुँत्य । भाव ह्यौतनख शमुन तूँ कांह छु असान, कांह छु वदान, जन तूँ केँह मतवालुँ छि समेमुँत्य ।

अमि वाकुँ पतुँ बीठ्य लुख पननि पननि जायि प्यठ । राँच हंजुँ आँठ छि बजेमुँचुँ । बैयि लँज कथबाथ सपदुँन्य ।

श्री रामकृष्ण—(डाक्टरस कुन)—युस यि भाव तोहि वुछवुँ, अथ मुतलख क्याह छु वनान तुहुँद साईनस? तोहि छा बासान जि यि सोरुय छु ढोंग?

डाक्टर—(श्री रामकृष्णस कुन)—येति यीत्यन मनशन यि सपदान छु, तति छु यि पोँजुय बासान । सांग लागुन छुनुँ बासान । (नरेन्द्रस कुन) येति चूँ ग्यवान ओसुख—‘माँ पागल कर, वोन्य छुनुँ ज्ञान तूँ व्यचारुँच जोरुँरथ,’ तमि विजि रूद न म्ये आबताब बुँ गोस थोद वैथिथ, पतुँ प्यव बडुँ मुश्किल सूँत्य भाव दबावुन । म्ये सूच छि दिखावुँ प्येयि नुँ करुन ।

श्री रामकृष्ण—(डाक्टरस कुन असवुनि त्रायि) चूँ छुख अटल, अचल तूँ समीर परबतस ह्यु । (सॉरी असान) चूँ छुख गंभीरात्मा । योंदवय अख होंस ल्वकटिस पां खोंडस मंज अचि तति छि पॉनिस छोंकुँ-छोंकुँ गछान, अमापोँज बँडिस पां डलस मंज छुनुँ किंही सपदान ।

डाक्टर—तोहि सूँत्य छुनु कथन कांह पूशिथ ह्यकान । (असुन) पतुँ लँज्य ब्याख कथ-बाथ सपदुँन्य । श्री रामकृष्ण छि भावुँ आवेशुच पनुँन्य ग्वडनिचि अवस्थायि हंज शेंछ्य बावान । तूँ काम, क्रूद वगारुँ किथुँ पाँठ्य यियि वशस मंज अननुँ, यिमुँ कथुँ ति वनान ।

डाक्टर—तोह्य आँस्यवुँ भाव आवेशस मंज जमीनस प्यठ प्येमुँत्य अँक्य नफरन ओस तोहि बूँटुँ सूँत्य लथ कँडमुँचुँ, यिमुँ कथुँ छम बोजमचुँ ।

श्री रामकृष्ण—सु ओस काली गाटुक चन्द्र हालदार । सु ओस अकसर मथुर बाबू हस निश यिवान । बुँ ओसुस ईश्वरु सुँदिस आवेशस मंज अनि गटि जमीनस प्यठ प्योमुत । चन्द्र हालदार ओस गोंडुँ प्यठय सोचान जि बुँ छुस ढोंग करान (सांग लागान) सिरिफ मथुर बाबू सुँद टोठ बननुँ बापथ । सु आव

अनिगटि मंज तु दिचनम बूँटुँ लतुँ । पानस आँसिम हट खँतिमुँत्य । सॉरी आँस्य दपान मथुर बाबू हस वनव । मगर म्ये कौरुख ठाख ।

डाक्टर—यिति छि दयि सुँज लीला । अमि सूँत्य ति मेलि लूकन शिक्षा । क्रूद किथुँ पाँठ्य गछि वश करुन । क्षमा कथ छि वनान, यि ज्ञानन लूख ।

श्री रामकृष्णस ब्रोंठकनि छि विजय बाकुँय बँखत्यन सूँत्य कथ-बाथ करान ।

विजय—म्येँ छु बासान जन तूँ कुस ताम छु प्रथ विजि म्येँ सूँत्य आसान । सु छुम हावान कति क्याह छु सपदान, दूरि ति ।

नरेन्द्र—देवदूत सुँद्य पाँठ्य अथुँरोट करिथ ।

विजय—ढाकाहस छिम यिम (श्री रामकृष्ण) वुछमुँत्य । यिहिँदिस शरीरस अथुँ लोगमुत ।

श्री रामकृष्ण—(असवुँनि त्रायि) अदुँ सु आसि बैयि कांह ।

नरेन्द्र—म्येँति छि यिम कूँचि लटि वुछमुँत्य । (विजयस कुन) लेहँजा किथुँ पाँठ्य वनुँ जि तुहुँजि कथि प्यठ छम नुँ पछ बेहान ।

बोंववार, 27 ओक्टूबर 1885

साडुँ पाँछ छि बजेमुँचुँ । नरेन्द्र, श्याम बसु, गिरीश, डाक्टर दोकडी, लोंकुट नरेन्द्र, राखाल, मास्टर बेतरि वार्याह बँखुँत्य छि हॉजिर । डाक्टर सरकार आव वुछनख नबँज तूँ कँरिख दवा तजवीज ।

दौँदिस मुतलख कथव पतुँ, श्री रामकृष्ण सुँदि दवा चनुँ पतुँ वोन डाक्टर सरकारन—‘वोन्य कँरि व तोह्य श्याम बाबू हस सूँत्य कथ बाथ, म्येँ दियिव इजाजथ ।’

श्री रामकृष्णन तूँ अँक्य भक्तन वोन, ‘ग्यवुन बूँजिवना?’

डाक्टर सरकार—तोह्य युस ग्यवान ग्यवान नचनि छिवुँ लगान, तोहि पजि सु भाव रुकावुन । डाक्टर ब्यूठ पतुँ । नरेन्द्र छु मोँदरि हटि ग्यवान । सूँतिय छि तानपूरुँ तूँ मृदंग बजान ।

ग्यवुन—‘माँ! जबरदस अनिगॉटिस मंज छि चॉन्य न्यराकार (रुँपुँ रौँस) सौँन्दरता गाहुँ त्रावान ।’

डाक्टर छु मास्टरस वनान—‘यि बाँथ छु यिहिँन्दि बापथ खतरनाक (मार) ।’

श्री रामकृष्णन प्रुछ मास्टरस—‘यिम क्याह छि वनान?’ मास्टरन वोन, ‘यि बाँथ हेँकि तोहि भावुँ-समाधि मंज वातनाँविथ—डाक्टरस छु अम्युक बयि।’

वनान वनानुँय गँय श्री रामकृष्ण भावस मंज। गुल्य जुँ गौँडिथ वोनुख डाक्टरस कुन वुछिथ—‘न न भाव क्याजि सपदि? अमापोँज वनान वनानुँय गँयि तिम गंभीर भाव समाधि मंज। शरीर गोख निश्चल (रूजिथ) तुँ अँछ ति रुकिथ। हचिव मूरथ हिश गँय कँल्य ति। न्यबरिमि दुनियुहुक ज्ञान रूदुख नुँ रछ खंड ति। मन, बुद्धि, चित्त तुँ अहंकार, सोरुय छु अँन्दरिय गोमुत। वोन्य छिनुँ यिम ब्रूँठिम्य पाँठ्य मनशि भावस मंज बासान। नरेन्दर छु मोँदुर हटि ग्यवान—बाँथ—

यि किछ सौँदर शोभा छि! तुहुन्द क्युथ सौँन्दर बुथ छुस वुछान! अज छि म्योन गरँ हृदयनाथ आमुँत्य, प्रैयमुक फंवारँ छु नचान।

श्री रामकृष्णस छु वोन्य न्यँबरिमि समसारुक ज्ञान सपुदमुत। ग्यवुन ति छु मोँकल्योमुत। पंडित, मुरुख (बेकँल) तुँ शुर्य-बुडुँ-जनानुँ सारिनुँय हुँघन मनन मूहित करन वाजेन्य तिहुँज कथ बाथ गँयि ब्येयि शौरू। सारी नफर छि रूजिथ गाँमुँत्य। सारी लूख छि तिहिँदिस मोँखस कुन मुदय गौँडिथ वुछान। वोन्य कति छेँ सों कठिन्य दग? मोँख छुख वुनि ति फोँल्यमितिस पम्पोशिक्य पाँठ्य दैवी खुशी सूँत्य नपुँ नपुँ करान।

श्री रामकृष्ण लँग्य डाक्टरस कुन वननि—“शर्म त्राव, दयि सुन्द नाव ह्यख, अथ मंज क्याह शर्म? शर्म, नफरत तुँ बयि (खोफ) यिम त्रेशवय रोजनस प्यठ छुनुँ ईश्वर मेलान। ‘बुँ छुस यूत बोँड मोँहन्युव तुँ दयि सुंद नाव ह्यथ लगुँ नचनि? यि कथ येलि बँड्य-बँड्य लुख बोजन, त्येलि क्याह वनन म्येँ? अगर ति वनन, हसौँ डाक्टर लोंग वोन्य दयि नाव ह्यथ नचनि; तुँ यि गछि म्यानि बापथ शरमि हुँज कथ।’ यिम सारी भाव त्राँविथ।”

डाक्टर—बुँ छुस नुँ तमि कँस्मुक नफर। लुख क्याह वनन, अम्युक छुनुँ म्येँ रछ खंड ति परवाय।

श्री रामकृष्ण—यूत तुँ छुय स्यठाह। (सारी असान)

“वुछिव, ज्ञान तुँ अज्ञान निशि तँरिव अपोर, त्येलि समजून सु। स्यठाह केंह ज्ञाननुक नाव छु अज्ञान। पाँडिताँजी (गाटुँजारुक) अहंकार ति छु अज्ञान। अख ईश्वरुँय छु सारिनुँय प्राणियन (जानदारन) मंज। अमि अटल बुद्धि हुन्द

नाव छु ज्ञान। तिमन खासतोर पाँठ्य ज्ञाननुक नाव छु विज्ञान। खोरस छु कौँड चामुत, सु कडनुँ बापथ छु अकि दोंयमि कंड्युक जोँरुथ। कंडि सूँत्य कौँड कँडिथ छि पतुँ दोंशवय कँड्य त्राँविथ छुँनान। गोँड छु अज्ञान रूपी कौँड दूर करनुँ बापथ ज्ञान रूपी कौँड अनुन प्यवान। अमि पतुँ ज्ञान तुँ अज्ञान दोंशवय छुँनुँय प्यवान त्राँविथ। तिक्याजि तिम छि ज्ञान तुँ अज्ञान निशि अपोर।

श्याम बसु—दोंशवय कँड्य त्राँविथ छुँनुँ पतुँ क्याह रोजि?

श्री रामकृष्ण—नित्य शुद्ध बोध रूपम्। अदुँ यि किथुँ ह्यकथ समजाँविथ? अँकिस जनानि प्रुछ अकि व्येँसि, क्याहे, च्ये छुय रून आमुत, हयय वनी रूँन्य सुँदिस यिनस प्यठ क्युथ मजुँ छु यिवान? तमि जनानि वोननस, ‘यि ज्ञानख चुँ तमि विजि येँलि च्येँति आसिय रून। वुन्यक्यन क्याह वनय बुँ।’ ब्रह्म क्याह चीज छु, यि ह्योँक नुँ अज ताम काँह मोँखुँ सूँत्य वँनिथ। अवय सपुद नुँ ब्रह्म वुन्युस ताम छ्योँट। सच्चिदानन्दस सूँत्य गिँदुन-द्रोँकुन कूताह मजुँदार (आनन्द दिनुँ वोल) छु; यि ह्यकव नुँ आँसुँ सूँत्य वँनिथ। यस यि खोँश कुँस्मती छि सुय ह्येँकि यि जाँनिथ।”

श्री रामकृष्णन वोन डाक्टरस बेयि—वुछिव अहंकार गछनुँ वरॉय छुनुँ ज्ञान यिवान। मनोश छु त्येली मुक्त सपदान येलि ‘मै’ (बुँ) दूर सपद्यस। ‘बुँ’ तुँ ‘म्योन’—योँहय छु ज्ञान। युस पोँज भक्त छु, सु छु वनान, ‘ही भगवान! चुँय छुख कर्ता, चुँय छुख सोरुय केंह करान, बुँ छुस बस यंत्र हुय। म्येँ यिथुँ पाँठ्य करनावान छुख, बुँ छुस तिथय पाँठ्य करान। यि सोरुय धन (दौलत) छु चोनय, ऐश्वर्य छु चोनय, समसार छु चोनय। चोनय छु गरँ परिवार, म्योन छुनुँ किँही ति, बुँ छुस दास। चाँन्य यि आँजा (हुकुम) आसि, तमी मुताँबिक छु म्ये’ सीवा करनुक अधिकार।’

“यिमव लूकव केंछा किताबुँ परिमचुँ छि तिमन छु अहंकार जमा सपदान। काली कृष्ण ठाकुरस सूँत्य आसुँ ईश्वरीय कथुँ सपुँजमचुँ। तँम्य वोन ‘सु सोरुय छु म्येँ मोलूम।’ म्येँ वोनस, युस दिलि प्यटुँ आमुत छु, क्या सु छा वनान फेरान जि बुँ आस दिलि प्यटुँ—बुँ आस दिलि प्यटुँ?—क्या तस सपद्या अमि बापथ घमंड? युस बोब छु, क्या सु छा वनान फेरान, बुँ छुस बोब?

श्याम बसु—तिम (काली कृष्ण ठाकुर) छि तोहि स्यठाह मानान।

श्री रामकृष्ण—हसौँ क्याह वनुँ, दखिनीश्वर काँली मंदरुँचि अँकिस वातजि क्याह अहंकार ओस! तस आँस्य पानस अख जुँ गँहनुँ (वस) लाँगिथ।

—येमि वति सो' ऑस यिवान, तमिय वति ऑस्य अख जुं नफर तस फ्र्येकि तल्लु पकान। वातजि वोन तिमन—'ए, दूर पख।' तुं बाकुंय नफरन हुंज कथ क्याह वनुं

श्याम बसु—महाराज, येलि भगवानुंय छु सोरुय केह करान त्येलि क्याजि मनशस पापुक दंड (सजाह) मेलान?

श्री रामकृष्ण—च्ये क्या बा छय सोनरुं सुंज हिश बोद (अकुंल)।

नरेन्द्र—सोनरुं सुंज बोद याने सॉनि रॉविथ मेनुन तोलुन।

श्री रामकृष्ण—हया बाया, चुं ख्ये अम्बुं तुं गछ खोश। बागस मंज केंच हथ कुल्य छि बागस मंज, केंच सास लंजि छि, कूत्य करोर वुंथुर छिस, यिमन सारिनुंय हुंद हिसाब थवनुं सूत्य क्याह फॉयदुं? चुं छुख अम्बुं ख्येनि आमुत तुं ख्ये पानस अम्बुं।

(श्याम बसुहस कुन) च्ये छुय यथ संसारस मंज मनशि शरीर ईश्वरुं सुंज साधना करनुं बापथ म्यूलमुत। ईश्वरुं सुंघन पादि कमलन मंज किथुं पॉठ्य सपदि भक्ति तमिची कूशिश कर। च्ये क्याह यिमन फॉजूल कथन सूत्य मतलब? फिलासफी रेंटिथ व्यचार करनुं सूत्य क्याह मेलिय च्ये? वुछ अजि पावि शराबुं सूत्य छुय च्ये नशि खसान, तमि पतुं यि हिसाब करनुं सूत्य क्याह बनिय जि शराब दुकानस मंज केंच मन शराब छु?

डाक्टर—तुं ईश्वरस निश छु आंथुं रोस शराब। केह छुनुं मोलूम जि कोताह छु!

श्री रामकृष्ण—(श्याम बाबू हस) ईश्वरस क्याजि छिव नुं आम मोखारो दिवान? तस्य प्यठ त्रॉविव सोरुय बोर। रूतिस नफरस प्यठ योदव केह बोर त्रॉविव तुं सुं कर्या जाँह अन्याय? पापस दिनुं सजा किनुं न सु जानन तिमय।

डाक्टर—तिहिन्दिस मनस मंज क्या छु, यि ज्ञानन तिमय। मोहन्युव क्याह वनि हिसाब लगॉविथ? तिम छि हिसाबुं अपोर।

श्री रामकृष्ण—(श्याम बसुहस कुन)—तोह्य कलकता वॉल्य छिवुं बस कुनिय राग ग्यवान। तोह्य छिवुं यिय वनान आसान, 'भगवान छु राय करान,' क्याजि अख थोवुन सोखस मंज तुं दोयुम थोवुन दोखस मंज। यिमन बेवकूफन यि पानस मंज छु तिय छि भगवानस अन्दर ति वुछान।

श्याम बसु—क्या कांह हे'क्या सूक्ष्म शरीर हॉविथ? क्या कांह हे'क्या यि हॉविथ जि सु छु (मरनुं पतुं) शरीरुं मंज न्यबर नेरान?

श्री रामकृष्ण—यिम पॅज्य भक्त छि, तिमन क्याह मतलब जि तिम हावन यि सोरुय। कांह हँहर मॉन्यतन यि या मतुं मॉन्यतन, तिमन क्याह छु रावान लबान अमि सूत्य। तिमन मंज छुनुं यिछ यछा रोजान जि कांह बोड मोहन्युव मानिना यिमन।

श्याम बसु—अच्छा स्थूल शरीर तुं सूक्ष्म शरीर यिमन मंज क्याह फर्क छि?

श्री रामकृष्ण—पंच भूतन (पृथ्वी, जल, तेज, वायु बेत्रि) हुन्द बन्योमुत युस शरीर छु सुय गव 'स्थूल शरीर'। मन बुद्धि, अहंकार, तुं चित छु बनवान 'सूक्ष्म शरीर'। येमि शरीरुं सूत्य ईश्वर सुन्द आनन्द लबनुं यिवान छु तुं ईश्वरस सूत्य म्युल छु गछान, सु छु 'कारण शरीर'। तंत्रन मंज छुख तथ वोनमुत—'भगवती तनु'। सारिवुंय अपोर छु 'महाकारण' (तुरीय) यि छुनुं ऑसुं सूत्य यिवान वननुं।

“सिरिफ वननुं सूत्य क्याह बनि? केंछा कॅरिव ति।

“कुस सुंथुर छु चतुंजिह नम्बर तुं कुस छु अकतॉजिह नम्बर यि यिया जांह सुंथरुक कारेबार करनुं वरॉय वननुं। यिम सुंथरुक कारेबार करान आसन तिमन निशि छुनुं सुंथरुंच ज्ञान करुंन्य कांह मुशकिल। अवय किन्य छुसवुं वनान, केह साधना कॅरिव, तेलि ह्यकख समजिथ जि स्थूल, सूक्ष्म, कारण तुं महाकारण कथ छि वनान। येलि भगवानस प्रार्थना करख त्येलि ऑस्यजि सिरिफ तिहिंघन पादि कमलन मंज भक्ति हुंज प्रार्थना करान।

“म्ये' ऑस मातायि निश कीवल भक्ति हुंज प्रार्थना कॅरमुंच। श्री मातायि हुंघन पादि कमलन प्यठ पोश अर्पण कॅरिथ गुल्य गॉडिथ ओस म्ये' वोनमुत—“मॉज रठ यि पनुन ज्ञान, यि रठ अज्ञान, म्ये' दि शुद्धा भक्ति। यि रठ पनुन छ्योट तुं यि रठ पनुन श्रूच, म्ये' दि शुद्धा (शोद) भक्ति। यि रठ पनुन पाप, यि रठ पनुन पॉन्य, यि रठ पनुन रुत, यि रठ पनुन नाकारुं म्ये' दि शोद भक्ति। यि रठ पनुन धर्म तुं यि रठ पनुन अधर्म, म्ये' दि शोद भक्ति।

“धर्म याने दान बेत्रि कर्म; धर्मस रेंटिथुंय प्येयि अधर्म रटुन, पॉन्य रेंटिथुंय प्येयि पाप ति रटुन। ज्ञान रेंटिथुंय प्येयि अज्ञान रटुन। श्रोचर रेंटिथुंय प्येयि छ्योट ति रटुन। यिथुं पॉठ्य, येमिय गाशुक ज्ञान आसि तस आसि अनि गटि हुंद ति ग्यान। यस अक्युक ज्ञान आसि, तस छु अनीकुक (वार्याहन हुन्द) ति ज्ञान। यस रूत्युक व्यचार छु, तस छु नाकारुक ति।

“यस सोरें माज ख्यथ ति दयि सुंघन पम्पोशि पादन हुंज भक्ति आसि तुं सु नफर छु शाबाशस लायख। तुं योंदवय हवनुक बतुं ख्यथ ति रोजि समसारस मंज राग...”

डाक्टर—तु सु छु अधर्म। ये त्यथ छुस अख कथ वनान। बुद्धन ओस सोरें माज ख्योमुत। सोरें माज ख्योन नुं जि दस्तुं-कूलिंज गॅयस। अथ ब्यमारि मँज ओस बुद्ध ऑफीन ख्यवान। निर्वाण-सिरवान छिवा जानान क्याह गव?—बस ऑफीन ख्यथ ओस बेंह्यस तुं बोवलु ह्यु गछान। न्येंबरिमि दुनियाहुक ओसुस नुं ज्ञानुंय रोजान। अँथ्य छि तिम वनान निर्वाण।

निर्वाणुच यि बदलुंय व्यछनय बूजिथ लॅग्य सॉरी असनि। पतुं सपुंज बदलुं कथ-बाथ।

श्याम बसु—महाराज थियासफी मुतलख क्याह छिवुं वनान?

श्री रामकृष्ण—असली कथ छि यि जि यिम लुख चेलुं बनाँविथ फेरान छि तिम छि हलकुं दर्जिक्य लुख आसान। तुं यिम लूख सिद्धियि मतलब वार्याहि कँस्मुँचि शक्तियि (ताक़त) यछान छि, तिम ति छि हलकुं दर्जिक्य। यिथुं पॉठ्य जन गंगायि अपोर पैदल गछुन, यि गॅयि सिद्धि। यिमन सारिनुंय हुंज दयस प्यठ भक्ति आसुंन्य छि स्यठाह मुशकिल।

श्याम बसु—मगर तिम लुख (थियासफी फिरकुं वॉल्य) छि हिन्दू धर्मस नवि सरें क्राँयिम करनुंच कूशिश करान।

श्री रामकृष्ण—म्यें छुनुं तिमन मुतलख खास केंह मोलूम।

श्याम बसु—मरनुं पतुं कोत छु जीवात्मा गछान? चँदरें लोकस मंज, तारकन हुंदिस लूकस मंज, किनुं बैयि कुनि लोकस मंज—यिमुं सार्यय कथुं छि थियासफी समजावान।

श्री रामकृष्ण—आसि, ! म्योन भाव क्युथ छु? जानान छुखा? हनुमानस प्रिछोव अकि दोह अँक्य जँन्य, अज कौसुं त्यथ (तॉरीख) छु? हनुमानन वोन—बुं छुस नुं वार, न्येंछतोरं यि केंह नुं जानान, बुं छुस सिरिफ श्री राम चन्द्रुं सुन्द सुमरन करान।' म्योन ति छु योहय भाव

श्याम बसु—तिमन (थियासफी मानन वाल्यन) छु महात्माहन हुन्दि वोंजूदुक विश्वास (यक्रीन-पछ) तोहि ति छा?

श्री रामकृष्ण—योदवय म्यानि कथि प्यठ बरोसुं छुय अवुं म्यें ति छि पछ। मगर, त्राव यिमुं कथुं वुन्यक्यनस। केंछा बॅलिन म्यें दोद तुं पतुं यिजि

बैयि। येलि च्ये म्यें प्यठ पछ छय त्येलि नेरि काँह वथ येमि सूँत्य च्ये मनुंच शाँती म्येलिय। चुं छुख वुछानुंय जि बुं छुस न पोंसु-टूँक या पलव रटान। येति छुनुं बैयि कुनि कँस्मुक ति भेंट (नजरानुं) प्यवान द्युन। अवय छि योंत वार्याह लुख यिवान (सॉरी असान)

(डाक्टरस कुन) च्यें नय हरगाह बुरें लगिय तुं त्येलि वनय अख कथ। च्ये छुय स्यठाह केंह—रोंपयि, यजथ, लेक्चर, वॉन्य लाग रछा दयस कुन ति मन। तुं योर ति आस कुनि कुनि यिवान। ईश्वर सुंजुं कथुं बूजिथ सपदिय वुजिन्य।”

केंचि कॉल्य पतुं वँथ्य डाक्टर नेरनुं बापथ थोंद। अमिय विजि आय गिरीश चन्द्र घोष तुं तिमव कोरें श्री रामकृष्णस पादि प्रणाम तुं बीठ्य पननि जायि। तस वुछिथ गव डाक्टर स्यठा खोंश, पतुं बीठ्य तिम बैयि।

डाक्टर—म्यानि येति आसनुं विजि यियनुं यि। युथुय नेरनुक वखुँत आव जि प्यव वॉतिथ। (सॉरी असान)

गिरीशस सूँत्य सपजुं सायनस एसोसिएशन मुतलख कथुं।

श्री रामकृष्ण—म्यें नियवुं अकि दोह तोर?

डाक्टर—योदवय तोह्य तोर गँछिव तुं तति दयि सुंजुं हॉरत अंगेज कॉरीगरी वुछिथ गँछिव बेहोश।

श्री रामकृष्ण—हँ?

डाक्टर—(गिरीशस कुन)—तुं योदवय सार्यय कामि कॅरिव, मगर भगवान ज्ञानिथ मँ आस यिहुंज पूजा करान। यिथिस रँतिस मोहनिविस क्याजि छिवुं बिगरावान?

गिरीश—क्या माहरा करुं? यिमव बुं येमि समसारुं सँदरुं तुं शकुँकि समन्दरुं मंजुं बोंट लोगुस (अपोर तोरुस) तिम क्याह मानख बैयि वॅनिव? तिमन मंज छुनुं अख ति सु चीज युस नुं बुं पवित्र मानुं। तिहुन्द गॅस तान्य छुस नुं बुं छ्योँट मानान।

डाक्टर—क्या चुं छुखुं जानान जि बुं ह्यकुं नुं यिहिँघन पादन हुंजि गरुंद ति तुलिथ? वुछ (श्री रामकृष्णुं सुंघन पादि कमलन हुंज गर्द तुलान तुं लागान कलस)

गिरीश—यिथिस रँतिस सातस प्यठ छि देवदूत ति मुबारक (शाबाश) करान।

डाक्टर—तुं खोरन हुंज गर्द तुलनस मंज यूत आशचर (तौजुब क्याजि? बुं ह्यकुं सारिनुंय हुंज गर्द तुलिथ। दियिव, दियिव—(सारिनुंय बॅखत्यन हुंज खोरन हुंज गरुद तुलान।)

नरेन्द्र—(डाक्टरस कुन) यिमन छि अँस्य भगवानुं सुंघ पाँठ्य मानान। यिथुं पाँठ्य सबजियन तुं जीवुं जाँचन मंज छि केँह तिथ्य जीव ति आसान यिमन सब्जी जाँच या जीवुं जाँच वनुन मुशकिल छु। यिथय पाँठ्य छु मनशि लूकस तुं दीवुं लूकस मंज अख जाय सों यँत्यथ यि वनुन मुशकिल छु जि यि नफर छा मनुश (इनसान) किनुं भगवान।

डाक्टर—हसौं, ईश्वरुं सुंजि कथि प्यठ छनुं मिसाल दिनुं सूँत्य काँम चलान।

नरेन्द्र—बुं छुस नुं ईश्वर वनान, दँपिव बुं छुस वनान जि भगवानस ह्य मनुश (मोहन्युव)

डाक्टर—यिथ्यन कथन मुतलख भाव गछन तल कुनुंय थवुँन्य, यिमुं कथुं गछन नुं ननि कडनि। म्योन भाव जोन नुं काँसि। म्याँन्य सख यार दिछ म्येँ बेरहम समजान। तुं तोही लुख केँरिव म्येँ पाँजार शलख तुं छुँन्युम केँडिथ।

श्री रामकृष्ण—(डाक्टरस कुन) यि म साँ वन। यिम छिय च्येँ सख लोल बरान। नँव नोश येँमि बेसबरी सान पननिस शौंगन कुठिस मंज रँनिस प्रारान छि तिथय पाँठ्य छि यिम तोहि प्रारान रोजान।

गिरीश—(डाक्टरस कुन)—सारिनुंय लूकन छि त्वहि प्यठ स्यठाह श्रद्धा।

डाक्टर—म्योन न्येँचुव यि दँप्य जि ति कोलय ति छम बेरहम जानान। म्योन तखसीर छु सिरिफ यूतुय जि बुं छुस नुं काँसि निश ति पनुँन्य भाव जाँहिर करान।

गिरीश—त्येँलि माहरा गव जान जि तोह्य मुचुरिव दिलुँकच दरवाजुं यारन बायन प्यठ दया केँरिथ—यि जाँनिथ जि तिम छिनुं तुहुँद वोँदुं जाँनिथ ह्यकान।

डाक्टर—बुं क्याह साँ वनुं पछ केँर्यवु? चानि खोतुं ति ज्यादुं छु म्येँ भाव वोतलिथ यिवान। (नरेन्द्रस कुन) बुं छुस कुन्यरस मंज ओश हारान।

(श्री रामकृष्णस कुन) “अछा बुं वना केँह, तोह्य माहरा छिवुं भावुं किस आवेशस मंज पनुन खोर दोंयम्यन हुन्दिस शरीरस प्यठ थावान यि छुनुं जान।

श्री रामकृष्ण—म्येँ छा तमि विजि मोलूम आसान जि बुं कस प्यठ छुस खोर थवान।

डाक्टर—यि छुनुं-जान, अम्युक तुं आसिवुं बूद आसान?

श्री रामकृष्ण—भवावेशस मंज क्याह छु म्येँ सपदान, यि किथुं पाँठ्य वनय? सों अवस्था (हालत) सपदुँनुं पतुं छुस सोचान अमा अवय मा छुम यि दोद सपदान। असली छुस बुं ईश्वरुं सुंदिस भाव—आवेशस मंज पागल गछान। पागल गँछिथ छुम यिथुं केँन्य सपदान, तथ क्याह करुं बुं?

डाक्टर—यिमव (श्री रामकृष्णन) मोन यि। पननि कथि प्यठ छि यिम दोख बावान। यि काँम छनुं ठीक, अम्युक ति छु यिमन ज्ञान।

श्री रामकृष्ण—(नरेन्द्रस कुन) ‘चुं छुख बडु चालाख। चुं क्याजि छुख नुं वनान? यि तार डाक्टरस फिकरि।

गिरीश—(डाक्टरस कुन) माहरा, तोहि छवुं समजिनस मंज गल्ली केँरमुँच। यिमन छुनुं अमि कथि हुँद दोख जि समाधि वक्तुं क्याजि लोग म्येँ यिमन (बॅखत्यन) खोरं। यिहुन्द शरीर छु श्रूच, पापुँच छनुं तथ छिह ति लँजमुँच। यिम यिथुं पाँठ्य तिमन् खोरं-अथुं लागान छि ति छु तिहिन्दि फॉयदुं बापथुँय। कुनि विजि छु यिहिन्दिस मनस मंज खयाल यिवान जि अमा तिमन लुकन हुँघ पाप पानस प्यठ ह्यनुं किनी मा छुम यि दोद वोतल्योमुत।

तोह्य दियतव पानस कुन नजर। अकि लटि आँसुँय च्येँ कूलिंज गॉमुँच। तमि विजि ओसुय ना दोख जि चेरं तान्य रातस हुशार रूजिथ क्याजि प्योँय परुन। अमापोँज तम्युक मतलब गव नुं जि चेरं ताम रातस परुन गव नाकारुं यिथय पाँठ्य छु मुमकिन जि यिम (श्री रामकृष्ण) छि अमि बापथ दुखी जि ब्यमार छुस। मगर यिमन छुनुं बासान जि बॅखत्यन खोर लागुन छु नाकारुं बल्कि छु यि तिहिन्दि बजाँयी बापथ।”

डाक्टर गव योँहय गॅल्य-गॅल्य तुं वोनुन गिरीशस, म्येँ होर च्ये निश। दिसाँ म्येँ खोरन अथुं लागनुं। तँम्य कोरं गिरीशस जयकार तुं वोनुन नरेन्द्रस ‘केँह ति वँन्यतव अमा पोँज गिरीशुन गाटुँजार छु मानुन प्यवान।’

नरेन्द्र—(डाक्टरस कुन) ब्याख कथ बोज। अख सायनसी ईजाद करनुं बापथ लाँगिव तोह्य पनुन पान दावस। तमि विजि दियिव नुं तोह्य पननिस शरीरस कुन ध्यान तुं न थँविव सोखुँ-दोखुक खयाल। मगर ईश्वरस मुतलख सायनस छु सारिवुँय सायनसव खोतुं बोड। त्येँलि छुना यिमन (श्री रामकृष्णस

बापथ) कोदरती जि यिम खारन भगवान प्रावनुं बापथ पनुन शरीर तुं सेहत ति दारस?

डाक्टर—“यीत्य ति धर्माचार्य वोथ्यमुंत्य छि—ईशू, चैतन्य, बुद्ध, मोहम्मद यिमन सारिनुंय ओस पोंतसस अहंकार आमुत—वोनुख—यि केह छुस बुं वनान, तिय छु ठीक। कोताह तौजुब छु!

गिरीश—(डाक्टरस कुन)—सुय दूश छु तोहि प्यठ ति लागू। तोह्य छिवुं यिमन सारिनुंय प्यठ। तोह्य छिवुं यिमन मंज नाकारुंगी वुछान। बस अवय किन्य ह्येकि तोहि प्यठ ति अहंकारुक दूश लगावनुं यिथ।

डाक्टरन कैर छोपुं।

नरेन्द्र—(डाक्टरस कुन)—यिमन युस अँस्य लुख पूजा करान छि सों मॉन्यतव छि ईश्वरुं सुंजुंय पूजा।

यिमुं कथुं बूजिथ छि श्री रामकृष्ण शुरुं सुंज पॉठ्य असान।

ब्रसवार, 29 अँकटूबर 1885

अज छि ब्रसवार। आँशुं गटुपछि शेंयम, श्री रामकृष्ण छि ब्यमार। श्याम पुकुरस मंज छि। डाक्टर सरकार छि यलाज करान। तिहुन्द मकानुं छु शांखरी टोला हस मंज। श्री रामकृष्णुं सुंज हालत किछ छि प्रथ दोहूँ रोजान, अमिच शेंछ ह्यथ छि दोहय डाक्टरस निश नफर गछान। दुहचि दँह बजे हिशि आसन। डाक्टर सरकारु सुन्द गरुं वॉत्य मास्टर श्री रामकृष्ण सुंज शेंछ वननुं बापथ।

डाक्टर बीठ्य गाडि मंज। सूँत्य ब्यूठ मास्टर ति। डाक्टर गँय वति ब्यमारन वुछान वुछान। गोंडुं चोर बागान, पतुं माथाघसा कोचि, तमिपतुं पाथुरिया घाटा गँछिथ गछन ठाकुरन हुंद गरुं। अमि पतुं गछन श्री रामकृष्णस मुलाहजुं करनि। डाक्टर गँय पाथुरियाघाटा ठाकुरन हुंदिस अँकिस मकानस अन्दर। अति लोंग हना चेर। गाडि मंज यिथ लँग्य श्री रामकृष्ण सुंजि सीवायि मुतलख कथ-बाथ करनि।

डाक्टर—तोह्य छिवा यछान जि यिम सोजोख दखिनीश्वर?

मास्टर—न माहरा तमि सूँत्य सपदि बँखत्यन बडुं तकलीफ। कलकता हस मंज रोजनुं सूँत्य रोजि प्रथ विजि युन गछुन। यिमन वुछनस मंज सपदि सुहूलियत।

डाक्टर—येति आसिवुं स्यठा खर्च व्यतुरावुन प्यवान।

मास्टर—अमि बापथ लगिनुं बँखत्यन कांह तकलीफ। तिम छि कुनि ति पॉट्य यिमन सीवा यछान करुंन्य। खर्च छु येति ति तुं तति ति। तोत गछनुं बापथ ह्यकव नुं यिमन प्रथ सातुं वॉतिथ। यिहय छि असि फिकिर।

डाक्टर तुं मास्टर गँय श्याम पुकुरकिस दुपूर्य मकानस मंज। कमरस मंज वुछ तिमव, श्री रामकृष्ण छि बडुं खोश पॉट्य बिहिथ। नख्रय छिख डाक्टर भादुडी तुं दौयिम बँखुंत्य।

डाक्टर सरकारन वुछ नबुंज तुं प्रिछनख शेंछ। कथ बाथ फीर भगवानस कुन।

डॉ. भादुडी—बु वनोवुं पोंज? यि सोरुय छु अपुज स्वपुन।

डाक्टर—सोरुय छु ब्रम। अमापोंज कस छु ब्रम तुं क्याजि छु ब्रम? तुं सॉरी लुख ब्रम जाँनिथ ति क्याजि त्येलि कथबाथ करान? भगवान छु पोंज तुं तसुंज सेंशटी छि अपुज। यि छुस नुं बुं मानान।

श्री रामकृष्ण—चुं छुख भगवान, बुँछुस तसुन्द दास, यि छु बडुं सोन्दर बाव। योंतान्य यि बूद छु जि शरीर छु पोंज, योंतान्य ‘बुं’ तुं ‘चु’ बाव छु बँनिथ। तोतान्य छु गुलाम (नोकर) तुं मॉलिक सुन्द बाव थवुन जान। ‘बुं छुस सुइ’ यिछ बोद थवुंन्य ति छनुं जान।

“अछा बुं वनुंयि च्ये ब्याख कथ? कुनि कमरस अगर चुं अकि अन्दुं वुछख या कमरुं अँदुर्य वुछख, कमरुं छु सुय।”

भादुडी (डाक्टरस कुन) यिमुं सार्यय कथुं छि वीदान्तस मंज। शास्तुर पर पतुं जानख।

डाक्टर—क्याजि? क्या यिम छा शास्त्र पँरिथ व्यदवान बनेमुंत्य? तुं यिहॉय कथ छि यिम ति वनान। क्या शास्तुर परनुं वरॉय सपदि ना?

श्री रामकृष्ण—हसाँ, वँन्यतव म्ये कूत्याह शास्तुर छि पँर्यमुंत्य।

डाक्टर—मोहन्युव हेकि बोजनुं सूँत्य केह गल्ली कैरिथ। तोहि छुवनुं सिरिफ बूजमुतुय ओत!

श्री रामकृष्ण—(डाक्टरस कुन) म्ये छु बूजमुत, चुं छुख वनान जि बुं छुस पागल। अवय किन्य छिनुं यिम लुख (मास्टरस तुं बैयन कुन इशारुं कैरिथ) च्ये निशि गछान।

डाक्टर—(मास्टरस कुन वुछिथ) बुँ क्याजि वनुँ यिमन पागल? “अमापोँज, अर्वुँ यि छुम वोनमुत जि यिमन छु अहंकार, म्येँ वैन्यतव यिम क्याजि छि लूकन पननि खोरन हुँज गर्द तुलनुँ दिवान?”

मास्टर—नतुँ छि लूख वदनि लगान।

डाक्टर—सोँ छि तिहुँज गल्ती। तिम पजन समजावुँन्य।

मास्टर—क्याजि? सारिनुँय जुँवदारन मंज छुना नारायण?

डाक्टर—अमि बापथ छुनुँ म्येँ कांह एतिराज। तेलि पजि तोहि सारिनुँय हुँज पादि गर्द तुलुँन्य।

मास्टर—काँसि काँसि मनशस मंज छु तिहुँद प्रकाश ज्यादुँ। पोन्थ छु प्रथ जायि। मगर तालाबस मंज, कोलि मंज, समंदरस मंज छु सु ज्यादय। तोह्य यूत फैराडे मॉन्यून, त्यूतुय मॉन्यूना कांह नोव ‘बैचलर ऑफ साईंस’ (Bachelor of Science)?

डाक्टर—अर्वुँ यि छुस बुँ मानान। अमापोँज भगवान कथ छुवोन मंजुँ अनान।

मास्टर—अँस्य छि अख अँकिस अमि किन्य नमस्कार करान जि सारिनुँय हुँघन दिलन मंज छु ईश्वर बिहित। यिमुँ कथुँ न छवुँ तोहि ज्यादुँ परिमचुँ तुँ न छुवुँ यिमन प्यठ व्यचार कोरमुत।

श्री रामकृष्ण—(डाक्टरस कुन)—कुनि कुनि चीजस मंज छु तिहुन्द गाश ज्यादँ। च्येँ वोन्युय म्येँ, सिरिय सुँजुँ जँचुँ छेँ जमीनंस प्यठ म्येँ चि मंज प्यवान तुँ गाश छु अकि प्रकाय सपदान। कुलिस प्यठ बेयी रंगुँ, तवुँ पतुँ ऑनस मंज बेयि तरीकुँ गाश प्रजलान।

डाक्टरस गँयि छोपुँ। सारी रूद्य छोपुँ कँरिथ।

श्री रामकृष्ण—(डाक्टर सरकारस कुन) वुछ च्येँ छुय येँमिस (पानस कुन हाँविथ) कुन प्रेयम पननिस दिलस मंज। च्येँ ओसुथ म्येँ वोनमुत जि चूँ छुख म्येँ यछान (लोल बरान)।

डाक्टर—तोह्य छिवुँ कोंदरतुक्य शुर्य (बचि), अवय छुसव यूत वनान। लूख छिवुँ खोरन प्यठ अथुँ थँविथ नमस्कार करान; अमि सूत्य छु म्येँ तकलीफ सपदान। बुँ छुस सोचान, यिथिस रूतिस मँहनिविस ति छि यिम बिगारान। केशव सेन ति ओस पनन्यव चेलव यिथय कँन्य बिगोरमुत। तोहि छुस यि वनान, बूजिव—

श्री रामकृष्ण—बुँ क्याह बोजुँ चॉन्य कथ? चूँ छुख लालची, काँमी (जनान लोर) अहंकार।

भादुडी—(डाक्टरस कुन)—याने सु गव जि च्येँ मंज छुय जीवुत (जीव तत्व)। जीवन हुन्द धर्म छु यिय—रोपयि, पोसुँ, मान—मर्यादायि हुन्द लूब, काम तुँ अहंकार। सारिनुँय जीवन हुन्द छु योहय धर्म।

डाक्टर—योदवय तोह्य यिथुँ पाँठ्य वनिव त्येलि आसुँ तुहुँदि हटिच ब्यँमॉय वुछिथ गछान। दोयम्यन कथन हुँज रोजि नुँ जोरूरथुँय। बहस योदवय करनुय प्येयि तुँ ठीकुँय ठीख वनुँ।

सारी छि छोपुँ कँरिथ।

श्री रामकृष्ण—चूँ पर गीता, भागवत, वेदान्त बेत्रि तुँ सोरुय समजख। क्या ईश्वर छुना यथ सँष्टियि मंज।

डाक्टर—न, तिम छि प्रथ जायि, तुँ अवय किन्य छनुँ तिहुँज खोज (छांडव) ह्यकान सपदिथ।

कँचि काँल्य ह्यचन दोयिमि कथु सपदुँनि। श्री रामकृष्णस छु प्रथ विजि ईश्वर भाव सपदान, अमि किन्य छु दोद बडनुक मोकुँ।

डाक्टर—(श्री रामकृष्णस कुन) भाव थँविव दबाँविथ। म्येँति छु स्यठाह भाव सपदान। तुहुँदि खोतु ति ह्यकुँ ज्यादुँ नँचिथ।

ल्वकुट नरेन्दर—(असान)—भाव योदवय हना ज्यादय बडि त्येलि क्याह कँरिव तोह्य?

डाक्टर—सु दबावनुच शक्ति (ह्यकथ) ति यियि म्येँ सूँतिय।

श्री रामकृष्ण तुँ मास्टर—वुनि हँकिव तोह्य ति वँनिथ।

मास्टर—तोह्य हँकिवुँ वँनिथ जि तोह्य क्याह कँरिव येँमि विजि तोहि भाव सपदि?

कँचि काँल्य फीर कथ बाथ रोपयन पाँसन कुन।

श्री रामकृष्ण—(डाक्टरस कुन) बुँ छुस नुँ अथ मुतलख सँचानुँय तुँ यि कथ छिवुँ तोह्य ति जानान। क्या साँ ठीक छुना? यि छुनुँ ढोंग (सांग)।

डाक्टर—म्योन ति छु यियि हाल। तुहुँज कथ छि अलग म्येँ छु रोपयि गलतानुँ वोथुय आसान।

श्री रामकृष्ण—यदु मलिक ति छु यिथय पाँठ्य दोयमिस खयालस मंज फोटमुत आसान। येलि बतुँ ख्येँनि छु बेहान, तमि विजि ति छु रोवमुत

आसान। पतहुँय छुस नुँ जि जान क्याह छु तूँ नाकारुँ क्याह छु—यि प्येयस ति लदान आँसस। काँह अगर वन्यस—‘यि मुँ ख्येँ यि छुनुँ जान बासान; त्येलि छु वनान—क्या? यि स्युन छुना ठीक? अर्वुँ पोंजुय हय छु।’

क्या श्री रामकृष्ण आँस्या यि शेंछ्य बावुँन्य यछान जि ईश्वर सुन्द सोचनुँ सूँत्य सपदन वाजन्य बे रुखी तूँ समसारी चीजन हुन्द सोचनुँ सूँत्य सपदन वाजन्य बे रुखी मंज छि वार्याह फरुँख?

तमि पतुँ बँखत्यन वुछिथ छि श्री रामकृष्ण डाक्टरस कुन इशारुँ कँरिथ वनान—“वुछिव, स्यद (पोखतुँ) सपदुँनस प्यठ छु चीज नरुँम सपदान। गोंडुँ आँस्य यिम स्यठा देर्य, वोन्य छि अँदरुँ नरुँम सपदान।”

डाक्टर—स्यद (पोखुँ) सपदुँनस प्यठ छु चीज न्यँबुँरुँ प्यठय नरुँम सपदान, मगर यथ जिंदगी मंज (येमि जनुँ) सपदि नुँ म्येँ यि केँह। (सारी छि असान)

डाक्टर छु नेरन वो। श्री रामकृष्णस छि वनान—“खोरन हुँज गर्द छि लुख निवान, तिमन छिवना ह्यकान मनाह कँरिथ?”

श्री रामकृष्ण—क्या सारिय लुख छा अखण्ड सच्चिदानन्दस रँटिथ ह्यकान?”

डाक्टर—अवुँकिन्य युस मत ठीक छु सु ह्यकिव ना तोह्य लूकन बाँविथ?

श्री रामकृष्ण—लूकन छि अलग-अलग रूच्य आसान। तमि पतुँ छिनुँ आध्यात्मिक (रूहानी) वति प्यठ जिन्दगी गुजारन वॉल्य हिविय हकदार आसान।

डाक्टर—सु किथु पाँठ्य?

श्री रामकृष्ण—रोचुन-प्रेयवुन अथ मंज कमि प्रकाँर्य छु बीद (फरुँख)? यस युथ ख्यन रोचान छु तूँ वयवुन छु, सु छु तिथुय बातुँ ख्यवान। काँह छु गाडन हुँद शोरबुँ पसन्द करान, तूँ काँसि छे तँजमुँच गाड पसन्द यिवान। काँह छु तमिच तरकाँर्य, तूँ काँह पुलाँव बनाँविथ ख्योन पसन्द करान। यिथय पाँठ्य छु अधिकाँरी सुन्द ति भीद (फरुँख)। बुँ छुस वनान गोंडुँ लगाँविव केलुँ कुलिस प्यठ निशानुँ, पतुँ चाँग्य रेँहि प्यठ; तमि पतुँ वुडवुनि चरि प्यठ।

शाम सपुद। श्री रामकृष्ण सपुँद्य ईश्वर सुँदिस ध्यानस मंज लीन। यूत तकलीफ छु। मगर माँन्यतव सु छु अँकिथ कुन प्यथ। जुँ चोर अँदरिम्य

(नँजदीकी) बँखुँत्य छि सोरुय वुछान। श्री रामकृष्ण रूद्य बडुँ चेर तान्य अँथ्य अवस्थायि मंज।

श्री रामकृष्ण आयि बेँयि यथ आलमुँचि अवस्थायि मंज। मणि छु नखय बिहिथ। तिमन छि ईकान्तस मंज वनान—‘वुछ अखंडस मंज ओस मन लीन गोमुत। अमि पतुँ यि केँह वुछ, तथ मुतलख छि वार्याह कथुँ। डाक्टर वुछ, सु तरि, तस सपदि केँचि काँल्य तोरुक अनुँग्रह। तस छुनुँ बेँयि ज्यादुँ वननुक केँह जोरुँरथ। ब्याख अख नफर वुछ। मनस मंज वोँथ—अनुन सुति पानस कुन। तसुँज कथ वनय पतुँ।’

शोकवार 30 ओंक्टूबर 1885

दुहचि साडुँ देँह छि बजेमचुँ। मास्टर छु डाक्टर सरकार सुंद गरुँ आमुत। वति प्यठ छु दोँयमिस पोरस प्यठ देवान खानुक बरामदुँ (डब) तती छु सु डाक्टरस सूँत्य बेँचस प्यठ बिहिथ कथ बाथ करान। डाक्टरस ब्रॉठकनि छु शीशि-बानस मंज पोन्त्य तूँ तथ मंज छि वोँजजि गाडुँ खेलुँ करान। डाक्टर छु पीँति पीँति पतुँ आँलुँ घल पाँनिस मंज त्रावान। तूँ आटिचि गोलि बनाँविथ पशस प्यठ चर्यन ख्यनुँ बापथ त्रावान। मास्टर छु बिहिथ यि वुछान।

डाक्टर—(मास्टरस कुन असुवुनि रोँयि)—यि वुछ, यिमुँ (वोँजजि गाडु) छि म्य कुन वुछान, यिथुँ पाँठ्य भक्त भगवानस कुन छु वुछान, मगर यिमव वुछनुँ यि म्ये छु योर आँलुँ घल त्रोवमुत। अवय किन्य छुसय वनान; सिरिफ भक्ति सूँत्य क्याह बनि? ज्ञान गछि। (मास्टर छु असान) तूँ वुछ हुपाँर्य चरि वुफेयि, तोर त्रावि म्येँ आँट्य गोलि तूँ तिमन चाव बयि (खोफ)। तिमन मंज छनुँ भक्ति, क्याजि तिमन छुनुँ ज्ञान। तिम छनुँ ज्ञानान जि यि छु त्युहुँद ख्यनुँ चीज।

डाक्टर आव बैठकि मंज तूँ ब्यूठ। चोँपाँर्य छि अलमार्यन मंज डेरुँ वाडुँ किताबुँ थँविथ। डाक्टर छि रछा थक कडान। मास्टर छु किताबुँ वुछान तूँ अख अख किताब तुलिथ परान। पोतुँस ब्यूठ कैन्न फेरर सुँज लीछमुँच ईशु सुँज जीवनी (जिन्दगी मुतलख किताब) परनि। डाक्टर छु मँज्य-मँज्य गप-शपा ति करान। कूताह मुशकिल हालातन मंज बन्यव गोंडन्युक होमोपैथी हुन्द हस्पताल। अथ मुतलख चिठि तूँ दोँयिम्य कागजात वोँनुन मास्टरस परनुँ बापथ। तूँ वोँननस “यिमुँ सार्यय चिठि वुछख 1886 किस ‘कलकता जरनल ऑफ मेडिसन’ रिसालस मंज। होमोपैथी प्यठ छु डाक्टरस बडुँ विश्वास।

मास्टरन तुज ब्याख किताब, मुंगर सुंज लीछमुं च 'नोव धर्म (Munger's New Theology) डाक्टरन वुछ यि।

डाक्टर—मुंगर सुंज ओसूल छि सही ख्याल तू दावाहन प्यठ दैरिथ। अथ मंज छुनुं यि लीखिथ। चैतन्य, बुद्ध या ईशूहन छु फलान्य कथ वैन्यमुं च अमिकिन्य पजि यि मानुंन्य।

मास्टर—(असान)—चैतन्य तू बुद्ध सुंज कथ नुं, मगर मुंगरन वैन्य अमिकिन्य गछि मानुंन्य।

डाक्टर—तुहुंज मरजी, चाहे यि वैनिय।

मास्टर—अवुं, काँसि नतुं काँसि हुंद नाव छु सोबूतुं बापथ ह्योन प्यवान। अवुंकिन्य मुंगर सुंद नावुय सही। (डाक्टर छु ठाठा कैरिथ असान)

डाक्टर—ब्यूठ गाडि प्यठ, सूंत्य छुस मास्टर। गॉड्य छि श्याम पुकुर कुन गछान। दुपहरुक वख छु। दोशवय छि कथ बाथ करान गछान। डाक्टर भादुडी सुंज कथ ति छि मंजुं मंजुं वोथान, क्याजि तिम छि श्रीरामकृष्णस निश कुनि कुनि यिवान।

मास्टर—(असवुंनि रोयि) तोहि मुतलख छु भादुडीहन वोनमुत जि सेरि तू कनि प्यटुं यियि जनुंम बैयि शोरू करनुं।

डाक्टर—सु क्युथ?

मास्टर—तोह्य छिव नुं महात्मा, सूक्ष्म शरीर वगोरू कथुं मानानुंय। बासान छु भादुडी साँब आसि थियासफिस्ट; अमि अलावुं छिवनुं तोह्य भगवान सुंद अवतार ह्योन ति मानान। अवय वोन तिमव असान असान जि अँज्यचि लटि मरनुं पतुं ज्येविव नुं तोह्य काँसि मनशि सुंदि गरि। कांह कुल कोट जुवुंजाथ सपदिव नुं तोह्य। तोहि पेंयि कनि फलि प्यटुं दस तुलुन। पतुं हय बैनिव वार्याहव जन्मव पतुं इनसान।

डाक्टर—हतुं साँ माल्या!

मास्टर—तुं यिति छुख वोनमुत जि साइनसुं किन्य युस तोहि ज्ञान छुवुं, यि छु अपुज, क्याजि सु छु वुन्य तू वुन्य छुनु। तिमव छि मिसाल ति दिचमुं च। यिथुं पाठ्य जुं क्रूर्य छि। अँकिस मंज छु तलु चँकि पोन्व वुजान। तू दोंयमिस छुनुं युथ चश्मुं चँकिस तल। सु पोन्व छुनुं यँचकाल तान्य पोशान। तुहुंद सायनसुक ज्ञान ति छु वँहराँच हुंदि पानिक्य पाँट्य, सु होखि।

डाक्टर—(हना असनुं सान)—अछा यि छि कथ!—

गॉड्य वॉच कार्नावालिस स्ट्रीट। डाक्टर सरकारन बेंहनोव डाक्टर प्रताप मजूमदार गाडि मंज। डॉ. प्रताप ओस राथ श्री रामकृष्णस वुछनुं बापथ गोमुत। यिम वॉत्य वोन्य श्याम पुकुर।

श्री रामकृष्ण छि दोंयमिस पोरकिस कुठिस मंज बिहिथ। सूंतिय छि केंह बँखुंत्य बिहिथ। डाक्टरस तू प्रतापस सूंत्य छि कथ बाथ सपदान।

प्रताप छु डाक्टर भादुडी सुंद जामतुर। श्री रामकृष्ण छु प्रतापस वुछिथ भादुडी सुंघन गोनन हुन्द जिकिर करान।

श्री रामकृष्ण—(प्रतापस कुन)—अहा! सुक्युथ सोंदर मोहन्युव छु बन्योमुत। सु छु ईश्वर सुन्द चिन्तन (सोचान) शोंद आचार तू निराकार-साकार साँरी भाव दौरिथ। (असवुनि त्रायि)—तू तुहुंदि बापथ क्या वोनन (डाक्टर भादुडी हन), जानान छिवुं? तिमव वोन—चूँकि तोह्य छिवुंनुं यिमन कथन मंज विश्वास करान, तवकिन्य यियिव दोंयमिस जन्मुं चँकरस मंज तोह्य कनि, रोडि फँल्य बैनिथ जन्म ह्यवान ह्यवान जिन्दगी शोरू करान। (सारी छि असान)

डाक्टर—(असान) अछा मॉन्यतव रोडि फँल्य कनि फँल्यव सूंतिय शोरू कैरिथ काँत्यहव जन्मव पतुं यिमुं बुं मनुंश बैनिथ, पतुं येलि योर (श्री रामकृष्णस निश) यिनुं पतुं पेंयि म्ये रोडि फँल्य तू कनि बैनिथुंय शोरू करनु। (डाक्टर तू साँरी लुख छि असान)।

श्री रामकृष्ण छि यूत बेराम, तोति छु तिमन ईश्वर सुन्घन भावन हुन्द आवेश सपदान तिम छि प्रथ विजि दयि सुंजुं कथुं करान। अँथ्य मुतलख छि कथुं चलान।

प्रताप—राथ वुछ म्ये तुहुन्द भाव दशा।

श्री रामकृष्ण—सों सपुंज पाँन्य पानय, मगर सँन्य आँस नुं।

डाक्टर—कथुं करनि तू भाव आवेश सपदुन छुनुं तुहुंदि बापथ वुन्यक्यन ठीक।

श्री रामकृष्ण—(डाक्टरस कुन) राथ योंसुं भाव दशा आँस तथ मंज वुछमख म्ये चूं। वुछुम ज्ञानुक छुख छु सोंदुर। मगर अँदरु बिलकुल होखमुत। आनन्द रस म्यूल नुं। (प्रतापस कुन) यि (डाक्टर) अगर अकि लटि लबि आनन्द तू ह्योर तू बोन सोरुय वुछि पूरन आनन्द बैरिथ। तमि पतुं करि नुं यिमुं कथुं जि 'बुं यि वनान छुस ती छु ठीक तू दोंयिम्य यि वनान छि सु छुनुं ठीक, ब्येयि यिमुं तेज तू सनुंनुं कथुं करि नुं।

हंगुं तू मंगुं बीठ्य श्री रामकृष्ण भाव आवेशस मंज डाक्टर सरकारस वननि—

“महीन्द्र बाबू, चुं क्याह छुख रोपयि रोपयि वनान!—कोलय-कोलय!—मान-यज्जथ! यि सोरुय छन त्रॉविथ एकाग्र च्यथ बँनिथ लगाव ईश्वरस मंज मन तू तुल ईश्वर सुन्दि आनन्दुक मजुं।”

डाक्टर संरकार छु छोंपुं कॅरिथ।

सॉरी छि छोंपुं कॅरिथ।

श्री रामकृष्ण—न्यांगटा ओस ज्ञॉनी सुंदि ध्यानुच कथ करान। पोनीय पोन्थ छु। ह्योर तू बोन सोरुय छु पानि बॅरिथ। जीव जन तू छु गाड तथ पॉनिस मंज आनन्दस मंज छांठ वायान। पॅजिस ध्यानस मंज वुछख चुं पॅज्य पॉट्य यि सोरुय।

“ज्ञॉनी सुन्द ध्यान बेयि कमि तॅरीकुक छु, ज्ञानान छुखुं? अनन्त आकाश छु, तथ मंज छु आनन्दस मंज पखुं वाहरॉविथ जानावार वुफान। चिद्आकाश मंज छु आत्मा-जानवर यिथय पॉट्य सॉर करान (फेरान)। सु छुनुं पंजरस मंज, चिद आकाशस मंज छु वुफान। आनन्द छु यूत जि आँथुय छुनुं।

बॅखुँत्य छि कॅल्य गॅछिथ ध्यान-यूगचि कथुं बोजान। कॅचि कॉल्य तुजि प्रतापन बेयि कथुं करनि।

प्रताप (सरकारस कुन)—बोजवय तू सोरुय छु छायिय छाय बासान।

डाक्टर—छाय अगर वनान छुख तू त्यैलि छि त्रन चीजन हुंज जौरूरथ प्यवान। सिरियि, वस्तु (चीज) तू छाय। वस्तु (चीज) वराय छा छाय आसान? यपॉर्य छुख वनान ईश्वर छु पोज तू पतुं छुख स्त्रेंशटी अपुज वनान! न, स्त्रेंशटी ति छि पोज।

प्रताप—ऑनस मंज यिथुं कॅन्य छुख चुं छाय वुछान तिथय पॉट्य छु यि समसार मन रूपी ऑनस मंज बासान।

डाक्टर—अकि चीजुंकि वजूदुं वरॉय ह्योक्या छाय ऑसिथ?

नरेन्द्र—क्याजि? ईश्वर हय वस्तु छु?

डाक्टर—रूद छवोंपुं कॅरिथ।

श्री रामकृष्ण—(डाक्टरस कुन)—अख कथ वॅनिवुं तौहि जबर। भाव अवस्था छि ईश्वरस सूँत्य मनकि संयोग (म्युल) किन्य सपदान। यि कथ वॅनिथ चेंय बेयि नुं काँसि।

“शिवनाथन ओस वॉनमुत, ‘स्यठाह ईश्वरुं सुन्द चिन्तन (सोंच) करुंनु सूँत्य छु छेमाग डलान।’ वनान छु समसारस मंज युस चेतन स्वरूप छु तिहुंद चिंतन (ध्यान) करुंनु सूँत्य छु अचेतन (बेहोश) सपदान। युस बोध स्वरूप छु, यिहिंदि बूदुं किन्य छु समसारस बूद सपदान तिहुंज चिन्ता (सोंच) कॅरिथ अबोध (बेहोशी) सपदुँन्य!!

“तू चोन सायनस क्याह वनान? बस यी ना जि येमि सूँत्य यि मेलुन या हुथ सूँत्य सु मीलिन तू छु फलॉन्य चीज बनान, वगॉरु वगॉरु। यिमन सारिनुँय कथन हुंज फिकर कॅरिथ—जड चीजन मंज प्यथ ह्येकि मनोश ज्यादय पाहन बूदुं हीन (बेहोश) गॅछिथ।

डाक्टर—तिमन जड चीजन मंज ह्येकि मोहन्युव ईश्वर सुन्द दर्शुन कॅरिथ।

मणि—मगर मनशस मंज हेँकि यि दर्शुन ज्यादय साफ पॉट्य लॅबिथ तू महापोरशन मंज तमिति हना ज्यादय साफ सपदिथ।

महापोरशन मंज छु तिहुंद प्रकाश ज्यादय आसान।

डाक्टर—अवुं, मनशस मंज छु दर्शुन जौरूर सपदान।

श्री रामकृष्ण—यिहिन्दि चैतन्य (चेनवन बावुं) सूँत्य छि जड (हेँसुं रँस्य) ति चेतन (हेँसुं वॉल्य) सपदान-अथुं खोर तू शरीर हिलान, तिहिंदि चिंतनुं सूँत्य छा काँह कुनि विजि बेंह्यस सपदान? लुख छि वनान, शरीर छु हिलान, ‘अमापोज तिम छि अँलुरावान, यि ज्ञान छुनुं। लूख छि वनान, ‘पानि सूँत्य दौद अथुं’, मगर पानि सूँत्य छुनुं जाँह ति कुनिविजि केँह दजान। पॉनिस अन्दर युस ताव छु, युस ओंगुन छु, तमी सूँत्य दौद अथुं।

मनश छि वनान, ‘इन्द्रियि छि पॉन्य पानय कॉम करान, अन्दर युस चैतन्य-स्वरूप छु, तिहुंज कथ छिनुं सोचान।”

डाक्टर सरकार वोंथ्य। वोंन्य बडन। श्री रामकृष्ण वोंथ्य थोंद।

डाक्टर—लुकन प्यठ येँलि तकलीफ यिवान छु तैलि छि तिम दयि सुन्द नाव स्वरान। क्या यि छा बस यिथय जि तिम छि—हे ईश्वर! चुँय छुख, चुँय छुख करान आसान? तौह्य छिवुं भगवानुं सुंजुं कथ करान क्याजि तौहि छुवुं हँटिस दौद।

श्री रामकृष्ण—‘बेयि क्याह वनुं?

डाक्टर—क्याजि, वॅनिव क्याजि नुं ति? अँस्य छि तिहिंजि कोँछि

मंज, तिहिंज कोछि मंज ख्यवान चवान। ब्यमार गछनस प्यठ वनव नुं तिमन अदुं कॅमिस वनव?

श्री रामकृष्ण—ठीख छु, कुनि कुनि छुस वनान। अमा पोंज कुनि कॅह छुनुं सपदान। डाक्टर द्राव। श्री रामकृष्णस निश छु मास्टर बिहिथ। एकान्तस मंजछि कथ बाथ सपदान। मास्टर ओस डाक्टरस निश गोमुत तुं वन्यन तिमुं कथुं यिमुं डाक्टरस सूत्य सपदेमुंचुं आसुं।

मास्टर—तिमव वोन बेयि, “चैतन्यन छु वोनमुत, बुद्धन छु वोनमुत, ईशुहन छु वोनमुत, क्या अवय करा पछ? यि छुनुं ठीक।”

श्री रामकृष्ण—येतिचि (म्यानि) कथुं यूत यूत सोचान छु, त्यूत त्यूत छे तमिस श्रद्धा पाँदुं सपदान। अहंकार छा यकदम चलान? तस छे यीच विद्या, मान, धनुं मगर येतिचि (पानस कुन इशारुं कॅरिथ) कथन छुनुं कम पायि मानान (याने म्यान्यन कथन छु आदर करान)

बटुवार, 31 अक्टूबर 1885

श्री रामकृष्ण छि बॅखत्यन सूत्य बिहिथ। दुहचि काह बजे हिशि आसन। मिश्र नावकिस अँकिस ईसाँई भक्तस सूत्य छि कथ बाथ चलान। मिश्रस आसि वाँस पांचत्रिह वॅरियि। यि छु ईसाँय खानदानस मंज जामुत। न्यँबुँर्य किन्य छु यि साहब सुँद्य पलव दलव छँनिथ अमापोंज अँदुँर्य छुस गीर्य वस्तुँर लॉगिथ। वुन्यक्यन छु अँम्य दुनिया मनसोवमुत। अँम्यसुँज ज्यनुं जाय छि पछुम (सरहद)। अम्यसुँदिस अँकिस बाँय सुँदि खांदरुक दोह आँस अँम्यसुन्द्य जुँ बाँय मूद्यमुँत्य। तनुं प्यठुँ ओस अँम्य दुनिया त्रोवमुत। यि ओस कुएकर (Quaker) फिरकुक।

मिश्र—‘सुय राम छु प्रथ काँसि मंज मूजूद।’

श्री रामकृष्ण छि लोकटिस नरेन्द्रस ल्वति ल्वति वनान; मगर अमि आयि जि मिश्र ति बोजि—

राम छु कुनुय। मगर तस छि सासुं बँद्य नाव। ईसाँय येमिस गाँड (God) वनान छि, हेँन्द्य छि तँमिसुँय राम, कृष्ण तुँ ईश्वर नावु सूत्य नाद लायान।

मिश्र—ईशू छुनुं मेरी हुन्द न्येचुव, ईशू छु साख्यात भगवान। (बॅखत्यन कुन) यिम (श्री रामकृष्ण) वुन्यक्यन छि यिथुं पाँठ्य बोजनुं यिवान, मगर

यिम छि साख्यात ईश्वर। तोहि लूकव पछोनवोन नुं यि। म्येँ छु-गोंडय ध्यानस मंज युहुँद दर्शन कोरमुत—वोन्य छुसख वुन्यक्यन साख्यात वुछान।

श्री रामकृष्ण—क्या च्येँ छियि दर्शन सपदान?

मिश्र—अवुँ, येँलि बुँ गरि ओसुस, तेलि ओसुम ज्योति दर्शन सपदान (गाश ओसुस वुछान)। अमि पतुं वुछुम ईशु। तमि रँपुँच कथ क्याह करुँ वोन्य। तथ सोन्दरतायि ब्रोंहकनि छि जनान हंज खूबसूरती खाक।

केंचि कॉल्य पतुं बॅखत्यन सूत्य कथ बाथ करान होव मिश्रन कोट-पतलून मुचरिथ गीर्य रंगुं श्रानुं पठ लॉगिथ।

श्री रामकृष्ण छि बरामदुँ पेँदुँ यिथ वनान—“यि (मिश्रस कुन) वुछवोनुँ, बोहदुर हूँ छु खड़ा।” यि वनान छि श्री रामकृष्ण समाँज मंज मगन सपदान। पछुम कुन बुथ कॅरिथ गॅय तिम समाँज मंज मगन।

केंछा योर कुन फेरनुं पतुं मिश्रस प्यठ नजर कॅरिथ छि असान। वुनि ति छि खड़ा। भाव आवेशस मंज तस सूत्य अथुँ मिलावान छि असान। अथुँ रँटिथ छिस वनान, ‘चुँ यि यछान छुख ति सपदि।

मिश्र (गुल्य जुँ गंडिथ—तमि दोह पतुं छु म्येँ पनुन मन, पनुँन्य प्राण, पनुन शरीर, सोरुय केंह तोहि अर्पन कोरमुत।

श्री रामकृष्ण छि भाव अवस्थायि मंज वुनि ति आसान। तिम छि बिहिथ। डाक्टर सरकार आय। डाक्टरस वुछिथ गॅय श्री रामकृष्ण समाधि मंज मगन। भाव हना शॅमिथ छि श्री रामकृष्ण वनान—‘कारणानन्द पतुं छु सच्चिदानन्द!—कारणुक कारण!’

डाक्टर छि वनान—‘आहन, माहरा।’

श्री रामकृष्ण—बुँ छुस नुं बेहोश।

डाक्टरन जोन जि श्री रामकृष्णस छु ईश्वरुँ सुन्द आवेश। अवय किन्य वोनून—‘अवुँ, तोह्य छिवुँ खूब होशस मंज।’

श्री रामकृष्णन कॅर असनहना तुँ लॅग्य ग्यवनुँ—

‘बुँ छुस नुँ शराब चवान,

अमापोंज ‘जय काली’ वॅनिथ छुस

अमर्यथ चवान

अमि सूत्य छुम नशुँ खसान

तुँ छुस मतान

लुख छि वनान
 बु छुस शराब चथ गोमुत मौंत।
 ग्वरुं सुंद द्युतमुत रस ह्यथ तुं, तथ मंज प्रवृत्ति रूपी मसालुं त्रौविथ
 ज्ञानुक— कलवाल छु मस बनाविथ बानस मंज छानान।
 मूल मंत्रुचि बोतलि मंज छुस बुं
 'तारा तारा' वैनथ तथ शौंद करान, तव पतुं छु म्योन मन सु चथ
 मतवालुं सपदान।
 'प्रसाद' छु वनान, युथ मस (शराब) चथ छि चोशवय फल (धर्म,
 अर्थ, काम, मोक्ष) हौंसिल सपदान।'
 ग्यवुन बूजिथ सपुद डाक्टरस ति भाव आवेश। श्री रामकृष्णस ति सपुद
 बेयि भाव आवेश। तँथ्य आवेशस मंज थोव तिमव डाक्टरुं सुजि को छि मंज
 खोरं। केचि कॉल्य शम्यव तिमन भाव। तवुं पतुं खोरं तुलिथ वोन तिमव
 डाक्टरस—
 "अहा, च्ये किछ मौर्य मंज कथ वैनथ! तसुंजिय को छि मंज छुस।
 बेमारि हुंज कथ वनुं तस तुं अदुं कस वनुं? आलव करनुं च योदवय जोरुथ
 पेयि तुं तिमनुंय दिमुं नाद।" यि वनान गयि श्री रामकृष्णुं सुंजुं अँछ अँदरि
 (आख ओंश)। तिम गय बेयि भावुं समोज मंज। तँथ्य अवस्थायि मंज छि
 डाक्टरस वनान— "चुं छुख खूब श्रूच (शौंद) नतुं किथुं ह्यकुं हा खोर थँविथ
 (तसुंजि को छि मंज)।" बेयि छि वनान— "तँस्य छि शौन्ती, येम्य ज्ञन रामुं
 सुन्द रस चव। विषय छु क्याह?—तथ मंज क्याह छु?—रोंपयि, पाँसुं, मान,
 शरीरुं सोख अथ मंज क्याह छुख थोवमुत? हता मनुं, बस ज्ञानुन कीवल राम,
 बेयि नुं कांह। येम्य नुं सु जोन, तँम्य क्याह जोन पथ?"

शुक्रवार 6 नवम्बर 1885

श्री रामकृष्ण छि श्याम पुकुरकिस मकानस मंज हेरि दख्युनकुन किस
 कुठिस मंज वोथदन्य। दुहचि नौ बजे आसन। यिम छि श्रूच्य पलव लांगिथ तुं
 डेकस प्यठ चंदनुक ट्योक कँरिथ। मास्टर ओंन तिहुंज ओंजा प्रौविथ सिद्धेश्वरी
 कॉली हुन्द प्रसाद (नवीद) नवीद अथस मंज रँटिथ तुं छि स्यठाह भक्ति भावुं
 किन्य श्री रामकृष्ण खड़ा। अमि पतुं छि नवीदुं मंज रछ खंड आँसस त्रावान तुं
 केँछा ड्यकस सूत्य लागान। नवीद रटनुं विजि कोंडुख खोरबानुं खोरव मंजुं।

मास्टरस कुन छि वनान— "स्यठा जान नवीद छु।" अज छि ओंशदुं मावस,
 अज छु कॉली पूजायि हुंद दोह।

श्री रामकृष्णन ओस मास्टरस हुकुम द्युतमुत जि ठनठनियाचि सिद्धेश्वरी
 कॉली हुंजि मुच प्यठ कँर्यजि पोश, नारजील, शकर तु सन्देश (अख बर्फी)
 अर्पन तुं कँर्यजि पूजा। मास्टरन कँर श्रान कँरिथ सुबहय सुबहय पूजा तुं
 ननुंवारिय ओंनुन श्री रामकृष्णुं सुन्दि बापथ नवीद।

श्री रामकृष्ण छु मास्टरस सूत्य, कमरस मंज ओरु योर पकान—खोरन
 मंज छुस स्लिपर। यूत सख दोद, तव पतुं ति छि श्री रामकृष्ण हमेशिक्य पौठ्य
 खोश।

श्री रामकृष्ण—तुं सु बाँथ ति छु जान। 'यि समसार छु दोखुक
 (अपज्युक) पर्दु।

मास्टर—आहन माहरा।

श्री रामकृष्ण गय यकदम हयबुंगु। खोरबानुं कँडिथ गय तिम बेयि ति
 भावस मंज खड़ा। तवुं पतुं गय गँहरे समाधि मंज। अज छु जगत मातायि हुंदि
 पूजायि हुंद दोह, शायद छु अवय किन्य तिमन बेयि तुं बेयि समाध लगान।
 स्यठाह चौर्य अख ज्यूठ वोश त्रौविथ ज्ञन तुं बडुं तकलीफुं सूत्य त्रौव तिमव
 भाव (समाध)।

श्री रामकृष्ण छि तँथ्य हेरिमिस कमरस मंज बँखत्यन सूत्य बिहिथ।
 दुहचि दँह बजे आसन। बिस्तरस प्यठ छि तँकियस सूत्य डोख दिथ।
 चोवा पासे छि बँखुँत्य बिहिथ। राम, राखाल, निरंजन, काली पद, मास्टर
 बेत्रि वार्याह बँखुँत्य छि। श्री रामकृष्ण सुन्दिस ब्यनथुंर सुँज कथ छि
 चलान।

श्री रामकृष्णन वोन मास्टरस, अज छि काली पूजा, पूजायि हुंद गछि
 केँह संज युन करनुं ति गछि जान। गँछिव वैनव बँखत्यन अकि लटि।'

मास्टरन वोन देवान खानस मंज गँछिथ बँखत्यन। काली पद तुं बाकुँय
 बँखुँत्य लँग्य पूजायि हुंद संज करनि।

हरदुं मावस छि। रॉच हुंजुं आँठ बजे आसन। तँथ्य हेरिमिस कमरस
 मंज आव पूजायि हुन्द सोरुय प्रबन्ध करनुं। वार्याहि कँस्मुँक्य पोश, चंदुन,
 बेँलुं पतुंर जवापोश, खिर तुं वार्याहि कँस्मुँचि मिठायि ह्यथ आय बँखुँत्य।
 श्री रामकृष्ण छि बिहिथ। अँन्ध अँन्ध छि भक्त मंडली आरुं कँरिथ बिहिथ।

शरद, राम, गिरीश, चुन्नीलाल, मास्टर, राखाल, निरंजन, लोंकुट नरेन्द्र, बिहारी बेत्रि वार्याह भक्त छि।

श्री रामकृष्णन वोन 'धूना (धूपु-कंठगन बेत्रि) अँनव।' केंचि कॉल्य पतुं कोर श्री रामकृष्णन जगत मातायि प्रथ केंह अर्पन। मास्टर छु नखुं तलुँय बिहिथ। मास्टरस कुन वुछिथ छि श्री रामकृष्ण वनान—'सॉरी कॅरिव केंचस कालस ध्यान।' बॅखुँत्य लॅग्य ध्यान करनि।

ग्वडन्यथ लॉज्य गिरीशन श्री रामकृष्णस पादि कमलन पोशिमाल, तमि पतुं लॉग्य मास्टरन चन्दुन लॉगिथ पोश। तमि पतुं राखालन, तमि पतुं रामन, यिथय पॉट्य लॅग्य सॉरी बॅखुँत्य पादिकमलन पोश लागनि।

पादि कमलन पोश लागनुं पतुं 'ब्रह्ममयी' वॅनिथ लोंग निरंजन दंडवत (पथर पान त्रॉनिथ) प्रणाम करनि। बॅखुँत्य छि 'जय माँ, जय माँ' वनान।

वुछान वुछान गॅय श्री रामकृष्ण समाधि मंज मगन। बॅखत्यन हुंज्जन अँछन ब्रॉठकनि आव श्री रामकृष्णस मंज अख हॉरान करन वाजन्य तबदीली ट्रेंट। तिमव वुछ तिहिन्दिस मोंखस प्यठ भगवॉनी प्रागाश। तिहिन्द दोंशवय अथु ऑस्य यिथुं पॉट्य वोंथ्यमुँत्य जि तिम ऑस्य बॅखत्यन वरदान तुं अभय बाँगरावान। तिहुंद शरीर छु रूज्जिथ गोमुत। न्यबरिमि समसारुक छुनुं तिमन बिलकुल जोँन। तिम छि वोंतुर कुन बुथ कॅरिथ बिहिथ। क्या यिमन मंज छा साख्यात जगतमाता प्रोँखुट गोँमुँच? सॉरिय छि कॅल्य गॅछिथ, मुदय गॅडिथ यि अँजीब वरतुं अभय दिनुँवाजिनि जगतमातायि हुन्दुं जिन्दुं मूर्ति हुन्द दर्शुन करान।

बुँखुँत्य छि तोँता-पाठ करान। गोँडुं छु अख भक्त ग्यवान, तमि पतुं सॉरी अँकिसुँय स्वरस मंज सु पद इकवटुँ परान।

श्री रामकृष्ण आय वारुँ वारुँ न्यँबरिमिस दुनियाहस मंज। तिमय वोन यि बाँथ ग्यवनुं बापथ—“ही श्यामा! सुधा तरंगिणी (अमर्यतुँ कौल)! छुनुं मोलूम चुँ कर कथ रंगस मंज छख रोजान?”

यि भजन खतुँम गछुनुं पतुं वोन श्री रामकृष्णन बॅखत्यन वोन्य ग्येँविव यि भजन—‘शंकरस सूँत्य छख आसुँवुँन्य तसुँन्दिस रंगस मंज रंगुँनुं आमुँच आनंद मंज मगन।’

श्री रामकृष्णन त्रोव बॅखत्यन हुँदि खुशी बापथ खिरु रछा आसस मंज, मगर सूँतिय गॅय भावस मंज तुँ रूदुख नुँ केंहति न्यँबर्युम ह्यस।

केंचि कॉल्य गॅय बॅखुँत्य श्री रामकृष्णस प्रणाम कॅरिथ नवीद ह्यथ देवानखानस मंज। सॉरी लॅग्य इकुँ वटुँ बडुँ आनन्दुँ सान नवीद ख्येँनि।

रॉच हुँजुँ नौ बजे आसि वख। श्री रामकृष्णन सूज शेंछ, 'रात सपुँज, सुरेन्द्रनि गरि छि अज काली पूजा, तोँहि छु साल, तोँह्य गॅछिव।'।

बॅखुँत्य वॉत्य आनन्द मनावान सिमला बाज्जर सुरेन्द्ररुन गरुँ। सुरेन्द्ररुन बेँहनॉव्य आदरुँ सान हेँरिमिस देवान खानस मंज। गरि छु बोँड दोँह, सॉरी छि भजन ग्यवान तुँ साज्ज वायान आनन्द मनावान। सुरेन्द्ररुनि प्यटुँ नवीद कॅरिथ वापस यिवान यिवान सपुँज बॅखत्यन अडराथ प्येँठिय।

